

5214.7/7964-6(4)

14

HARVARD
UNIVERSITY
LIBRARY

1884

明詩紀事

貴陽陳 田輯

丁籤

伍晏 一首

晏字時清清流人弘治己酉舉人官平度州訓導

筆精清流伍晏能詩如草根蛙鼓吹花底鳥笙歌閒
階秋掃葉荒徑晚挑蔬隔寺聞僧磬微燈認釣舟俱
清雋可喜

漁滄廟

漁滄之下潭水流漁滄之上雲悠悠行雲流水自今古荒城
故壘行人愁龍為蛇兮鼠為虎腥毛臭骨皆塵土遊魂寂寞
無所歸時傍寒蛩泣秋雨

錢福 二首

福字與謙松江華亭人弘治庚戌第一人及第授翰

林修撰有鶴灘集六卷

四庫總目福少而穎悟詩文以敏捷見長故委巷鄙俚之詞率以歸之今觀是集實少俳諧之作知小說多附會也

田按修撰雖以敏捷見推然合格之作亦頗矜鍊

立春日齋居對雪

齋居何所作春雪是佳期淨入年華淺光含暝色遲鳴絃流

艷曲拂簡映新詩此夕山陰客扁舟興可知

元日早朝

暫遂鵷行覲紫宸九重仙樂奏芳辰龍樓高拱星河近鳳歷

初頒歲月新曙色漸分三殿曉鐘聲散入萬家春小臣共沐

恩波渥願效華封祝聖神

靳貴 一首

貴字道充丹徒人弘治庚戌第三人及第授編修兼

司經局校書厯春坊右中允左諭德兼侍講進太常

少卿掌翰林院事擢禮部侍郎以忤劉瑾左遷光祿

寺卿尋復官改吏部進禮部尚書文淵閣大學士參

預機務改戶部進太子太保武英殿大學士贈太傅

諡文禧有戒菴集二十卷

靜志居詩話文禧康陵舊學南巡時臨其喪命詞臣撰祭文皆不稱旨御製一首云朕居東宮先生為傅朕登大寶先生為輔朕今南遊先生已矣嗚呼哀哉代言者嘆惜歛手

送蘭孝先還廣陵

正好論心又欲行江風不盡別離情十年交誼晏平仲一郡
才華馬長卿樹遶帆檣隔瓜渚天低睥睨見蕪城相思有意
君知否九曲亭前看月明

楊旦一首

旦字晉叔建安人太師榮曾孫弘治庚戌進士授吏
部主事歷員外郎中遷太僕少卿改太常以忤劉瑾
謫温州知府遷浙江提學副使歷應天府丞順天府
尹擢禮部侍郎改戶部督京通倉出理餉甘肅進右
都御史總督兩廣軍務尋掌南院進南戶部尚書改
南吏部召拜吏部尚書未至勒致仕有惜陰小稿

田按三楊子孫尚書最爲通顯嘉靖初桂萼張璁以
議禮驟貴旦極言不可會吏部尚書喬宇罷召以旦

代未至爲給事中陳洸所劾致仕時議頗不直洸
旦在武城聞致仕之召賦詩云北客忽傳新命下中
流急放一舟還浮名已謝雲霄上公道猶存天地間
老遣情懷聊藉酒閒攜杖履卽登山應知此外無餘
事寂寂松陰晝掩關
具見恬淡之志云

白馬關

怪石巉巖水亂流柳勻新綠弄春柔滿陂芳草眠黃犢風景

居然似建州

鄭瓘一首

瓘字溫卿蘭谿人弘治庚戌進士授鄒平知縣改長
洲再改楚雄判官有蛙鳴集

田按溫卿詩任臆發抒不受模範蛙鳴集自序云蛙
水族之微也候至則不得不鳴候去則不得不止其
鳴其止蛙不得以自由亦不自知其故可謂善於自
喻其斫藤詩云藤蔓傍樹生曲直善依附葉葉還枝

枝旦旦復暮暮遂忘異根株似謂得援助欣欣共陽
春濯濯同雨露始本相扶持今反生嫉妬日月被遮
隔乾坤受滓汙幾微失前知事極悲晚悟可
謂警切動人但集中如此者不可多得耳

舟中

嶺南病後驚歸晚連日舟行更逆風寂寞殘年猶是客蕭騷
短髮忽成翁晨光峭峭寒侵骨夜色沈沈雨打篷屈指於今
三十四可憐蹤迹漫西東

惜春

桃花飛盡李花飛過眼韶光春已非怪煞杜鵑情太薄聲聲
只道不如歸

童琥一首

琥字廷瑞蘭谿人弘治庚戌進士授刑部主事歷員

外郎中出為江西按察副使有梅花集句和百詠梅
花詩寫懷釣臺拾遺等集

題畫梅

野塘春煖水平鋪數點冰花映玉壺明月一簾詩思好東風
吹夢過西湖

王統一首

統臨川人弘治庚戌進士官同知

謝家埠

卸卻孤帆野水涯黃塵撲面走輕車白沙翠竹不多路茅屋
竹籬凡幾家山腳雲低烏帽沒樹稍風颭酒旗斜眼前景物
供詩料獨有寒梅未肯花

林夔 一首

夔字元佐莆田人弘治庚戌進士官戶部員外

經趙邊地

地控龍荒險山連雁塞雄鼓笳秋月白榆柳晚霜紅九塞關
河限千秋頗牧功烽煙猶未淨長劍倚崆峒

劉愷 一首

愷字西臯保定新安人弘治庚戌進士授刑部主事
歷鴻臚寺卿擢副都御史總督漕運進兵部侍郎禮
部尚書有西臯集

題畫屏

山木風吟翠葉石壇月冷蒼苔一曲高山流水可人今夜誰

來

唐臣 一首

臣字堯佐營山人弘治庚戌進士官兩淮鹽運使有

拙菴集

田按四川經籍志稱堯佐營山人費經虞蜀詩則以
為內江人余檢弘治題名碑錄蓋蜀詩誤也

道林寺

側徑榛蕪轉更高道林西寺入層霄龐眉道士曾相識流水

空山話六朝

梁棗 一首

棗字弘宇南海人弘治壬子舉人

寄董宗輔

東江去悠悠送子孤行舟舟行復幾時江鄉生遠愁采采芙蓉花欲寄無蹇修念昔攜手好中情鬱綢繆商歌寄逸響素琴鳴芳洲無由慰離索一雁橫高秋

方垺 一首

玘字世重莆田人弘治壬子舉人官南康通判

野泊

野泊傍沙洲更深微雨歇忽聞水鳥聲推篷見新月

張乾 一首

乾字尙勤莆田人弘治壬子舉人除分宜教諭

蘆塘雜興

籬菊有佳色園禽多好音應嫌歸計晚白首始抽簪

何孟春 四首

孟春字子元郴州人弘治癸丑進士授兵部主事歷員外郎中出爲河南參政擢太僕少卿進本寺卿以右副都御史巡撫雲南遷南兵部侍郎召拜吏部侍郎以議大禮出爲南工部侍郎尋削籍隆慶初贈禮部尙書諡文簡有燕泉集十八卷

餘冬敘錄丁丑八月之夕夢侍涯翁坐翁拂篋欲書趣春檢詩稿髣髴記其一首二句云金花燦爛錦雲香上界飛書到幾行因心動不暇再目而自續云風雨忽驚吹面冷不教清夢看成章於是遂醒可異也田按子元及西涯之門觀所著餘冬敘錄於西涯詩話緒論娓娓不倦并夢中亦續西涯詩稿可謂服膺不忘矣惟才力稍弱句調平易而學殖既深亦自遠於俗調今所傳燕泉集十卷乃其六世孫惟文搜逸輯錄觀餘冬敘錄所列之詩集不一見知非當日完帙也

責亡奴

爾賤爲人奴吾與爾何負家貧食指單恃爾同駢拇長日無力作使令才左右胡無一旦間決策背吾走爾甯有高志衣食卽父母奴求免饑寒理不論好醜去我何所爲他人爾何有亡奴前致辭公責敢不受奴心切有懷不識所歸咎奴以農爲事自當力田畝奴以漁爲事自當持網筍置身牙儉間亦自知秤斗轉易得數錢自無虛井臼所恨日營營不容停腳手不如官人奴安坐得肉酒困思事主公豈意一無取饑寒僅能救往事俱落後主公性多防日夕在監糾辛苦自立名奴輩誰知某嗟奴言若此所望亦良厚爾當初來時是聽誰何誘奴職各有司惟臧獲爲偶在田漁市井事事不容苟

昔日王大夫買僮楊寡婦聽教千百端受笞十八九我雖無贏餘已脫諸躡蹂非分豈可希欲居豐殖藪豪強力不兼況爾茲塵垢而敢生責望常懷乞漿酒家人務溫飽此事誰於狃奴今有二心我杖可勝叩

與李憲副閱西行地圖見崑崙山

神仙非所慕吾亦到崑崙地脈應西極天容向午昏雪知何代積山是此方尊漢使勞相問黃河豈有源

大司馬馬公生辰

氣完靈降嶽申甫定重生合代天工亮應逢帝運亨回瀾須砥柱程物必鈞衡經濟惟豪傑儀刑在老成四朝裨聖政羣士聳官評道協風雲會功依日月明廟謨何慷慨風采極崢

嶮豸服欣初稱麟袍美晚榮詩人歌顯顯史氏表觥觥鼎足
 平無頗葵心老更傾經筵深啟沃章奏極忠誠醫國三年艾
 防邊萬里城職隆宮傅望權總夏官卿朔漠傳威令高班絕
 抗行朱顏霞有暈華髮雪初盈金石盟將遍丹青貌已成龍
 章凡幾煥花甲此時更短句非云頌聊申仰止情

漢宮柳

依依漢宮柳本不傷離別何事學顰眉春來故愁絕

鄭岳 四首

岳字汝華莆田人弘治癸丑進士授戶部主事改刑
 部歷員外出為湖廣僉事遷廣西按察副使改廣東
 歷江西按察使布政使以勘事被誣奪職為民尋起

右副都御史巡撫江西召為大理寺卿進兵部侍郎
 有山齋集二十四卷

東南嶠外詩話汝華侍郎著有蒙難錄其稿本久佚
 惟山齋集中有幽居書懷詩序云庶人宸濠久畜異
 志子由泉轉藩裁抑逆萌濠不能堪喉同寮橫加誣
 許威賄上下文致其辜逮繫踰年始得罷歸憂患中
 嘗作蒙難錄茲摘其概書之詩云咄咄日書空禍階
 慨伊始蟻穴昔何微潰川浩無埃數至諒難違修身
 以順俟明夷古所悲演易在美里厲貞乃終吉齋心
 悟玄理谿壑絕險巖千仞猶可窮人心如其面談笑
 伏兵戎田灌平生交酒杯不相容魏其力解紛乃進
 遭禍凶往事昧明訓邈哉廉藺蹤
 蘭陔詩話公在江西知宸濠有異志嘗作詩云吳淠
 招死士密置滑澗間豈知真將軍輕車出藍田逆節
 竟斧鑕明鑑垂簡編其言果驗
 田按汝華以勘李獻吉與巡按相許事獻吉執汝華
 親信吏言汝華子云受賂宸濠助之朝議遣大理卿
 燕忠勘問兩斥之因罷為民獻吉為宸濠所助其曲
 直不辨自明汝華非徒風骨嶽嶽亦留心鄉邦故事
 其所輯莆陽文獻具有經緯五字詩亦有風韻

送何子元少宰改任南都

夏秋多霽雨沈陰翳晨光積潦斷衢塗欲濟苦無梁送子出
城圍策馬登前岡回颿激流雲顛氣變清商憑高一舒眺天
宇何茫茫感茲物候異鬱鬱情內傷古稱楚多才弱冠已擅
場博學富文藻節操誠慨慷南望鍾山遙白雲懷帝鄉風露
日夕清蘭桂發幽芳與子結綢繆望望不得將平生契分深
白首相激昂浮榮久難恃萬世一何長願言保終始青簡諒
毋忘

和林汝儀招飲溪閣

旭日散林霏澄波銜山影離城纔幾許已覺非人境几杖松
壇幽雞犬柴門靜幸逢素心人高談白晝永

幽居書懷

平生相傾慕會合意何敦相期振頽靡撫乂憫元元如何自
積猜枝葉傷同根川洛構黨禍善類鮮安存王導仇伯仁千
載抱煩冤古來同嘆息棄置復何言

蘭陔詩話此詩為李獻吉作也公與獻吉同年進士
交好甚篤及為獻吉所構待之如初觀此詩猶惓惓
不忘舊好後宸濠伏誅獻吉坐為濠作陽春書院記
小蓬萊詩獄辭連及林見素力救之黃才伯有讀見
素救獻吉疏詩云憐才不是雲莊老愁殺中山獵後
狼中山狼傳乃馬東田所作以訾獻吉負康德涵者
朱錫鬯以為康李未嘗隙未然觀獻吉之擠公若此
其於德涵亦可知矣

古溪亭為盧師陳進士題

晶晶湖光淨分流到石莊鳥歸山色暝風送雨聲涼秋水菜
莢泝煙蘿華子岡小詩供日課幽興一何長

秦金一首

金字國聲無錫人弘治癸丑進士授戶部主事歷郎中出爲河南副使遷參政歷山東布政使以右副都御史巡撫湖廣入爲戶部侍郎改吏部擢南禮部尙書就改兵部入爲戶部尙書乞歸起南戶部尙書召拜工部尙書進太子少保太子太保再改南兵部卒贈少保諡端敏有鳳山詩集十卷

碧山吟社志弘正間社會既輟之後司徒鳳山秦公歸白留都邀二泉邵公心泉呂公惠巖顧公松閣頓公藕塘秦公石村陳山人結詩會山中亦以碧山名社然止就諸公之別墅如二泉精舍鳳谷行窩惠巖小築次第舉會蓋亦慕修敬之風而一寄意焉

題復得竹茶爐卷

竹爐歡喜復歸禪一別山房五十年聲入松風還簌簌夢回湘月共娟娟僧堂宿火無塵劫石檻清泉有淨緣莫怪眞公招不返已將詩卷萬人傳

許天錫 四首

天錫字啟衷閩人弘治癸丑進士選庶吉士授吏科給事中進工科都給事中上疏劾劉瑾遂自經將以尸諫或曰瑾遣人殺之嘉靖中追賜祭葬有黃門稿

列朝詩集天錫在詞林以能詩爲李長沙所稱嘗題詩車盤驛丹青閣上云青山當面似無路黃犢出林還村鄭繼之題其後云風流不見許黃門文字丹青閣尙存最憐佳句車盤驛黃犢青山何處村筆精許黃門正德中奉使安南於僧寮中得枯木一片狀若山峯黃門厚酬主僧攜歸閩中自刻詩云萬年木精化青牛瘦骨不朽沈江洲江洲水急魚龍湫神物始出隨回流玲瓏翠峯誰能收山僧得之溪峒

首蠻荒僻遠絕賞鑿木爾韜晦誰怨九洞江先生好事者邂逅願脫千金裘古今琴材出爨下拔爾幸免為人標風厓雨谷借我老無復夢想仍丹邱歲久流落士夫家已百年不知寶惜棄之泥滓予友高景倩博物好古遂乞以歸洗刷塵垢置之齋中名其齋木山同社俱有詩紀其事然竟不知何木也
田按黃門稿中警句如居庸關云鐵騎連三戍金城迫九關分水關云絕巘愁飛鳥清潭落斷霓蒼梧閒眺云越雋西連山似戟桂江東注水如苔晚至平南云千里家山殘夢斷一川煙水暮愁生皆可誦也

往歲

皇華思往歲一騎入雲中
笛裏愁人月霜前落葉風
寒川洶戰骨野火燎秋空
聞道河西寇今來欲向東

胡來

胡來青黍盡胡去幕南開
日落單于口秋生李牧臺
陰風吹殺氣戰骨蝕蒼苔
洒淚向千古斯人安在哉

憶江上草亭

每到芳春便憶歸
夢中江國舊斜暉
渚邊舴艋有時放沙上
鷓鴣無數飛野興頓從官後減
封書更覺病來稀
年華半百堪惆悵
長往山林意轉違

題畫

三楚秋心萬里流
蕭蕭黃葉滿汀洲
籜冠芒屨詩翁瘦
併作江南一片秋

陳玉一首

玉字德卿沂州衛籍本高郵人
弘治癸丑進士選庶吉士改監察御史出為浙江提學副使改福建歷應天府丞右僉都御史擢兵部侍郎進南左都御史贈

丁筆卷六
十一
太子少保

喜雨上金郡刺

亂紅粘濕擁籬根惻惻餘寒靜掩門
疏雨人家寒食暮暝煙
天色杏花村西山淨洗新眉黛
東野青回舊燒痕政喜坡仙
在吾郡一亭虛敞對吟尊

鄭汝美 一首

汝美字希大閩人弘治癸丑進士官戶部員外

閨情

遠戍來何期對人休自訴早晚有佳音
鵲噪門前樹

方璘 一首

璘字文玉莆田人弘治癸丑進士歷官雲南布政使

有鑑湖集

二月

二月山城未見花一江春水漫蒲芽
先生睡熟渾無事閒詠
新詩送落霞

姜芳 一首

芳字實夫蘭谿人弘治乙卯舉人除廬陵教諭遷大理司務

次董東湖韻

遙隔清江看九峯白雲來往斷行蹤
跣趺坐到無言處雲本
無心我更慵

尚書襄毅八子三尚書太子太保誥太子太保論及
文簡也皆以甲科任事才敏見稱弇州別集錄宗門
盛事以福州之林靈寶之許為稱首然襄毅遇劉瑾
以委蛇狗意不免削籍文簡遇分宜以柔和易制幸
躋台輔季世之
居通顯難矣哉

子夜歌

吳女采白苧行過芙蓉塘清波照紅粉花面兩相當

劉瑞 二首

瑞字德符內江人弘治丙辰進士選庶吉士授檢討

以忤劉瑾除名瑾誅起浙江提學副使進南太僕少

卿就遷禮部侍郎卒贈尚書隆慶初追諡文肅有五

清先生集十八卷外臺集六卷

靜志居詩話五清先生正德丁丑以按察副使提督
浙江學政廣購經史子集發十一府儒學公貯備覽

每冊隸書於序尾鈴以關防今各府俱散佚人間子
每每見之惟湖州府學尚多存者予家所鈔施宿張
誤會稽二志乃其所儲本也公有五清先生集十八
卷又外臺集六卷訪之未獲也
田按何大復有送五清先生赴浙江提學歌云天台
文宿衝紫霄先生捧勅馳星軺越山桃李花萬樹春
色早渡錢塘湖憶昨先生遭斥逐漂泊湖湘望巴蜀
九江鴻雁春冥冥七澤龍蛇畫盤曲史稱劉瑾用事
瑞卽謝病貧不能還鄉依李充嗣於澧瑾榜瑞為奸
黨此詩所謂斥逐漂泊紀其事也五清集世所罕見
子從全蜀藝文志
獲詩二首亟登之

東溪驛

登登山路高還下馥馥香林淺又深何處斜陽重回首東溪

寥落百年心

全蜀藝文志東溪先生書屋也

播南吟

水交箐裏有猿嘯聽罷令人思欲迷聞說近來多虎蹟行人

莫到夕陽西

劉麟 四首

麟字元瑞本安仁人世為南京廣洋衛千戶因家焉

弘治丙辰進士授刑部主事歷員外郎中出知紹興

府以忤劉瑾罷為民瑾誅起知西安府歷陝西參政

雲南按察使謝病歸召拜太僕卿進右副都御史巡

撫保定再引疾歸起大理卿擢工部尚書勒致仕以

殿工追論落職卒贈太子少保諡清惠有集十二卷

四庫總目麟集長興朱鳳翔為序稱其詩駸駸韋杜未
免太過至稱其標格高人雲霄胸中無一毫芥蒂故
所發皆盎然天趣讀之足消鄙吝則得其真矣
藝苑厄言劉元瑞詩如閩人強作齊語多不辨

田按坦上翁人品高潔居朝日永陵以冰清玉潔目
之可謂知臣莫如君也前後罷官及謝病凡四退歸
皆寓長興之瀆南坦嘗與太白山人孫太初龍霞吳
充陸崑施侃結社於茗溪號茗溪五隱所著興趣天
然頗似擊壤一派今錄其少矜鍊者性好樓居貧不
能構八十初度文徵仲繪神樓圖贈之兼繫以詩朱
射陂楊升菴相繼有作並錄於此徵仲云僊人謾說
愛樓居咫尺丹青足卷舒坐守黃庭幽闕迴讀殘真
詰夜窗虛游心物外疑無地寄迹空中樂有餘一笑
闌干不成倚浮雲奄忽意何如射陂云神樓一何峻
神樓峻而安胡不京洛遊畏彼峽路間峽路誠崎嶇
險于太行山歌以言志神樓峻而安升菴云安期昔
製神樓散射陂今作神樓曲神樓主人南坦翁欲往
從之限空谷吾聞仙家五城十二樓樊桐方丈繞瀛
洲長風引舟不可到環中根像空神遊坦翁元是神
仙流何年飄然下丹邱天庭摘藻採鸞鶴雲屏立仗
鳴驂驅北斗南宮不肯住挂冠歸來營菟裘碧瀾罨
畫開苔雪紫煙縈帶彩雲夾新波菱榜泛青翰過雨
蘋風爽鳥矚人閒九戩播聲詩天上五龍傳睡法青
李遙看尺牘來雀羅淨掃昏眸開尻輪神馬馳萬里
坐我赤明龍漢臺一氣孔神存中夜手翳華芝海若
託中有真人巾金巾授以靈文老復姪玄珠纍纍蒼

留別孫太初

玉鳴烽沈析闋歌太平豐屋天翔鬼瞰室廟謨何用
談佳兵遊仙夢覺聞清嘯載賡清潤連清調願從廣
成順下風肯許襄童窺未照咸池濛汜紛如馳扶起
混沌須神醫他年合遇神樓散約公海上尋安期

夕燈蛩語上空堂門外芙蓉繫野航
高興逐雲先到寺離心
入雁不成行黃花伴客年年雨
短鬢彫秋夜夜霜歧路無情
人自遠酌中戎馬過重陽

九日

初日輕煙隱薜蘿轉疑詩句在山阿
道人不上青峰久黃葉
忽隨霜鬢多獨把菊杯迎物候
故偏風帽起高歌川原淨好
能無雨如此重陽一謾過

鷗

城南秋草碧於煙無數白鷗隨我船
風帆乍舉驚呼去拍水
過溪相對眠

渡湖

廣文遺韻留檣散雞犬圖書共一船
自說江湖不歸事阻風
中酒過年年

劉玉 七首

玉字咸栗萬安人弘治丙辰進士除知輝縣入爲御
史以劾劉瑾繫獄削籍放歸瑾誅起河南僉事歷福
建副使擢大理少卿進右僉都御史提督江防改巡
撫鄖陽尋再督江防改理院事以平宸濠功進右副
都御史擢刑部侍郎議大禮忤旨坐李福達獄削籍

隆慶初贈刑部尚書諡端毅有執齋集二十卷

靜志居詩話侍郎詩娟秀絕塵比於喬莊簡似過之田按執齋立朝以風節著詩特蘊藉

禽言 二首

不如歸去白日西沈水東注一身出門千萬歧擾擾亡羊何處住不如歸去

惡阿惡阿山石崎嶇山徑惡豺狼奔走斷人行此鳥有情空淚落惡阿惡阿

仙村

路轉俄聞雞犬聲柴扉開處白雲生插花稚女有嬌態倚竹老翁無俗情靈藥雨餘閒自採好峯雲外畫難成沿溪剩有桑麻地擬卜鄰居事耦耕

神女祠

巫山綽約似新粧江水縈回空斷腸花落石壇遺廟在鶴歸郢樹故城荒更無詞客瞻雲氣猶有詩人弔夕陽欲向麻姑問消息千年誰見海塵揚

花

春半春前春後花紅花白花黃半吐半開半落堪憐堪賞堪傷

秋興

秋杜相邀酒甕開接離顛倒坐莓苔黃鶴唱罷我先醉紫蟹肥時君再來

春遊

雪霽輕雲弄日華，偶乘春興過鄰家。
小園桃李猶含凍，狼藉東風苦棟花。

張羽 五首

羽字鳳舉，泰興人。弘治丙辰進士，除涪安知縣，擢御史，出知保定府，改邵武，歷河南副使、四川參政，進河南布政使，有東田遺稿二卷。

田按東田集，選家未有及之者。四庫館開，兩江督臣錄進，余得館中副本，其詩專講音節，字句不盡入格錄，其合作固彬彬乎唐人之雅音也。

晚春舟中

風光二月成虛擲，客路三千鎮獨歸。
去國漫憐行日遠，到家常恐見花稀。
燈穿夜舫春蟲入，帆過晴沙宿鷺飛。
零落當時

多少事，東風江上淚沾衣。

次玉岡秋興韻

瀘水烟銷秋日晶，關河風色慘邊情。
年光暗惜江蘼晚，秋鬢愁看客鏡明。
十道羽書聞夕警，五更城角落寒聲。
季鷹自昔多幽思，不爲鱸魚歎遠征。

寄陳別駕汝耀

三山雁使隔年回，傳道甘棠樹重培。
別駕風流餘簿領，郡齋蕭散到蓬萊。
榕陰暗處衙聲合，荔子紅時吏俸來。
獨向樵川愁病在，好音遲子笑顏開。

客久夢中代內作

梅蕊先春發，山茶寒著花。
郎從前日去，蚤晚過長沙。

里人陳生善歌舊嘗識之十五年後再聞其歌因贈
餘音尙憶小梁州十五年前作漫遊重倚朱欄歌一曲楚天
涼月在西樓

黃衷 一首

衷字子和南海人弘治丙辰進士授南戶部主事改
北歷員外改南兵部進郎中出知湖州府歷福建轉
運使廣西參政雲南布政使以右副都御史巡撫雲
南改湖廣擢工部侍郎改兵部有矩洲集二十卷

靜志居詩話矩洲詩若野練晴飛孤嶼白木綿春試
小枝紅白酒河橋花底社黃螺沙市蠶家兒處處短
牆圍薜荔家家生計種扶留鳥際忽開衡岳寺林端
恰下灌江船桐木歸來津口渡楊花飛過驛南樓狀
南中風景
歷歷在目

古別離

惻惻復惻惻送君遠行役攜手出潼關何時渡沙積沙積路
綿綿胡塵晝暗天莫辭頻勸酒動是幾經年經年嗟馳騫虜
地無芳樹野曠似連雲雲深日如暮日暮氣轉寒長驅襲可
汗壯夫多遠思龍劍莫輕看

熊卓 四首

卓字士選豐城人弘治丙辰進士授平湖知縣入爲
御史以忤劉瑾罷歸有熊御史詩選

空同集余收輯士選詩得六十篇皆精細言華
藝苑卮言熊士選詩如寒蟬乍鳴疏林早秋非不清
楚恨之深致
田按士選詩不耐多吟不如錄蕭寥短篇令人涉想

送客南還

遙望城南道青青草色新春風生錦棹時送楚江人
送人赴道州任

月照河臺酒離情那可消衡陽飛雁盡君去更迢迢
有懷

展卷春日遲輕陰閉香閣舊雨人不來鳥啼閒花落
書獻吉扇面

遊人歸欲盡流水去何已高談轉忘情山青雲靡靡
朱諫二首

諫字君佐樂清人弘治丙辰進士官贛州知府改吉
安有蕩南集

田按君佐家近雁山故集名蕩南頗
好事嘗修雁山志四卷詩亦不俗

憶靈巖

曾到靈巖寺斜陽帶晚鴉山童掃僧舍茗椀對殘花拄杖看
危石移尊就淺沙題詩轉相憶惆悵惜年華

寄孫南江僉憲

再到山中訪紫霞紺園衰草夕陽斜舊時僧鶴歸何處獨立
溪橋數落花

黃相一首

相字弼甫莆田人弘治丙辰進士官九江知府有一
溪集

謁岳武穆廟

古廟沈沈掩夕曛西連孤壠結愁雲金牌卒墮和戎計鐵騎

空同少保軍萬里鑿輿終北狩百年基業遂中分乾坤遺恨
依然在散作秋濤不忍聞

田按唐士綱有謁岳廟詩一坏冤士
千年血五國荒城萬里心亦警句也

唐錦一首

錦字士綱上海人弘治丙辰進士授東明知縣擢兵
科給事中以忤劉瑾謫深州知州瑾誅遷南工部主
事歷南刑部郎中出爲江西提學副使有龍江集十

二卷

賞梅

劇愛幽芳盡日看凍雲烘透粉痕乾吟邊風勁愁聞角嗅處
香清自倚闌澹拂湘簾橫月影薄裁吳苾護春寒含情莫怨

相知晚欲補離騷下筆難

郭東山 二首

東山字魯瞻掖人弘治丙辰進士官四川參政有石

崖集

王士祿濤音集參政詩如披薪刈楚叢雜之中不乏
菁秀五言如哭誠之云劍外情偏割猿邊淚有餘送
王侍御巡蜀還朝云停驂劍閣曉迴雁少城春七言
如甯武關云古堞寒雲嚴晚戍空壕疏雨散昏鴉次
見素韻云山迂鳥道連三蜀
棧入雞頭轉七盤並可誦

雁門關

關城風色日颼颼廣武新軍玉壘頭百晦石田山下業數聲
羌笛戍邊樓枯沙遠燒憐春望白草黃雲結暮愁珍重北門
誰管鑰回中獵騎未全收

晚赴納溪

急櫓鳴灘赴納溪
牛羊下處亂鳥啼
水田石路壠江上
何日看山獨杖藜

黎鳳一首

鳳字乾兆新喻人
弘治丙辰進士官
監察御史

守素園

綠槐門巷白蘋洲
吟過春光醉過秋
到眼風花渾是夢
置身邱壑更何求
水流須信石不轉
山靜任教雲自浮
君看萬松枝上鶴
一巢從此占清修

范兆祥一首

兆祥字延和豐城人
弘治丙辰進士
改庶吉士授檢

討以言事下錦衣獄
出為涇府長史復以事逮詔獄

謫戍永州尋放歸有半松遺稿

田按延和七歲作登堯山詩稱神童以敢言兩下獄其送人詩有云入世無官好沿江有淚揮亦可悲矣

分甯道中

寒水澗頭花亂開
燕子石下波縈迴
獨鞭瘦馬截流去
鸛鳥一聲山雨來

龍霓一首

霓字致仁南京牧馬千戶所籍本宜春人處士瑄子

弘治丙辰進士官浙江按察僉事

金陵詩徵致仁罷官後入茗溪社與劉南坦吳甘泉陸玉厓孫太初為五隱

姑蘇道中

又從書劍去旅夢落金閨野鶴巢難定春蠶繭自忙空江鳴
急瀨高樹隱斜陽歸計何時決移文動草堂

楊禩 一首

禩字介福武陵人弘治丙辰進士選庶吉士歷禮兵
刑三科給事中以忤劉瑾致仕瑾敗起吏科都給事
中歷右通政進南太僕卿

桃川

平川臨古邑野舫隔煙岑人代有秦晉風光無古今吟餘嘯
鳥寂坐久落花深蓬鬢俄成雪支筇且漫吟

陳洪謨 一首

洪謨字宗禹武陵人弘治丙辰進士授刑部主事出

爲漳州知府歷雲南按察使以右副都御史巡撫江
西入爲兵部侍郎贈兵部尙書有靜芳亭摘稿八卷
登九江希庾樓

新樓極虛做竹樹環陰森何意塵囂中有景如山林昔人盛
風致遺蹟依孤岑我來坐移晷冷然風滿襟

羅鳳 一首

鳳字子文一字汝文吉安泰和人南京水軍右衛籍
弘治丙辰進士除興化推官遷南監察御史出爲宛
州知府改鎮遠再改石阡有簡齋家藏集十卷

田按子文守袁州武宗南巡自車馬糗糒之外一無
所供監司問以佃遊之備近幸之餉曰非守所宜職
以不勝繁劇改簡爲吾黔鎮遠知府再忤御史改石
阡請老自號簡翁博雅好古蓄法書名畫金石遺刻

多至千卷所居在天印山下又自號印岡顧東橋贈
詩云道人築室天印下邱壑重重到茅舍謝墅花驕
羅綺春秦淮舟泛星河夜紀其事也家藏集
僅有鈔本流傳甚少故選家多不之及也

重遊南山

天涯莽莽寄行蹤興在溪雲水月中簿領不妨遊半日杖藜
今又繼諸公機心誰辨問蕉鹿歧路直堪擬雪鴻俯仰悠然
成一笑南山秋色浩無窮

明詩紀事

貴陽陳田輯

丁籤

林廷模 一首

廷模字利正永福人弘治戊午舉人官潮州同知有

兩江漁唱

田按利正永福人中弘治戊午舉人晉安風雅以為
閩人石倉詩選亦誤為貢生余檢福州志殊不爾兩
正之

古意

念遠勞魂夢含愁度歲年穿花雙蛺蝶偏傍繡簾前

劉龍 二首

龍字舜卿襄垣人弘治己未第三人及第授編修進
修撰改兵部主事歷吏部員外尋復修撰遷侍講學
士改侍讀擢禮部侍郎進南禮部尚書改南吏部兵
部贈太子太保諡文安有紫巖集四十八卷

田按尚書不以詩名紫巖集中佳句如詠淮陰侯云
運屬真人應混一才收國士故無雙送楊兵部歸成
都云禁中頗牧推司馬劍外江山待主人答司徒質
齋韓公云吏部文章原絕代相州功業早安邊他如
堂前燕子悲王謝洞口桃花笑阮劉春水仙舟依岸
柳午風僧磬出煙蘿笙歌韻歇空啼鳥羅綺香消自
野花花雨碎時簾半捲柳煙低處燕交
飛卽當日以聲律擅名者亦不能過也

送王元甫還姚江

有客自浙東長江信所適片帆鼓天風千里還瞬息泊舟石
頭城覽勝入京邑城中多貴介冠蓋填紫陌懷刺不肯投折

腰向誰揖謂予典春曹廿年曾舊識一顧輒盡歡張燈話深
夕高風凌古人逸氣脫凡格照乘安用珠連城未爲璧如何
抱逸才乃獨事幽寂明時苦難逢流景還易擲携酒餞江干
戀戀不忍釋相望久延伫暮山倚天碧

登燕子磯

燕子磯頭拂曙來秋光催客上高臺百年風日重陽節六代
江山濁酒杯病體欲扶驚老態清時無補愧樗材不須細把
茱萸看且共諸公笑口開

劉蒞一首

蒞字惟馨涪州人弘治己未進士授戶科給事中以
忤劉瑾廷杖削籍瑾敗起金華知府告歸再起知長

沙遷江西副使均未赴卒有秋佩先生集四卷

田按惟馨於正德初劾劉瑾馬永成谷大用張永魏彬邱最羅祥傳輿等云此輩投閒抵隙誣上行私一言一笑都有機關一止一行揣知上意府庫錢帛用如泥沙玉帶蟒衣施及童稚章奏落其掌握機務因之自決敗祖宗之家法傷清朝之治化累陛下之初政成天下之禍亂若失今不言異日禍端養成亂本固牢事已無及責將誰歸史但稱劉健謝遷去位蒞與刑科給事中呂紳各抗章乞留語侵瑾廷杖削籍於惟馨事實首尾尙未完備秋佩集世罕傳本四川通志亦未知其卷數余獲此集亟登一詩詳錄劾瑾等疏語以補史闕

酒後

洞天昨夜吼蛟龍吸盡西江未放空李白劉伶呼不起酒旗

莫再惹東風

林廷楫 一首

廷楫字利瞻閩人弘治己未進士授兵部主事歷員

外郎中出知蘇州府歷雲南江西參政湖廣布政使

以右副都御史巡撫保定六府擢南兵部侍郎召拜

工部侍郎進本部尙書贈少保諡康懿有小泉錄稿

寄友

停舟江上憶逢君紫鳳青鸞迴不羣此日相思空有夢隔江

春色暮山雲

孫緒 一首

緒字誠甫故城人弘治己未進士累官太僕寺卿有

沙溪集二十三卷

四庫總目孫緒無用閒談有日文章與時高下人之才力亦各不同今人不能爲秦漢戰國猶秦漢戰國不

能為六經也世之文士尺寸步驟影響摹擬晦澀險
深破碎難讀云云其意蓋為李夢陽發可以見其趨
向矣其詩格頗近李東陽而深以何孟春等注東陽
樂府稱其過於李杜為非蓋譏譽者之溢量非排擊
東陽也
明詩統沙溪瀛州才子所作清新典麗足以名世

妾薄命

妾命薄薄如紙君意陌上塵妾意江邊水陌塵易飛揚江水
絕清泚京兆多傾城永別從今始京兆猶自可莫入臨邛市

池亭晚坐有懷

池上晚成趣雨餘涼不禁濕雲低閣水癡霧遠迷林去鳥憑
誰辨哀蛩識此心美人在何處良夜自沈沈

周倫 二首

倫字伯明崑山人弘治己未進士授新安知縣入為

御史歷南大理寺丞進少卿擢都察院僉都御史提
督操江歷南工部兵部侍郎進南刑部尚書召拜刑
部尚書復改南贈太子少保諡康僖有貞翁淨稿二

十卷

梅花草堂集公懸車引年嘗遊武林子大理丞鳳鳴
侍而張通參寰亦侍其尊祁州翁聯艦合樽四韻齊
下積篇成帙題曰西湖倡和錄
列卿紀尚書行草逼真晉人

送徐錦衣

錦衣南躍馬萬里嶺雲長三月辭京國中途是故鄉龍光金
節重劍氣鐵衣涼聖主綏柔意蠻煙草樹荒

發揚州

揚州已二月寒色帶蕭森夜雨太無賴瓊花定不禁驛船千

里夢客路五更心迢遞長江隔雲天雁字沈

鄧尉山房

行看一水來天目坐見千峰湧太湖嘯鳥不知遊客至閉關
唯有定僧孤鏡中水月俱清寂象外煙雲自有無勝地久懷
來較晚買山真欲辦青蚨

謝廷柱 二首

廷柱字邦用長樂人弘治己未進士除大理評事歷

官湖廣按察僉事有雙湖集

靜志居詩話邦用詩如犀塵在握不染游塵
田按雙湖詩饒清趣微傷婉弱

宿驛頭鋪鄒家風雨達旦次韋蘇州郡齋韻

茅檐一夜雨歲暮千山客朝來涉前溪不見釣磯石僕夫憂

遠道野館謀今夕千丈陟霜崖風寒少行迹

都穆 一首

穆字元敬吳人弘治己未進士授工部主事歷禮部

郎中乞休加太僕少卿致仕有南濠詩略

國寶新編元敬清修博學網羅舊聞考訂疑義多所
著述齋居蕭然樂奉賓客衒杯道古以永終日詩雖
過爾冲泊竟非俗具
田按元敬博雅纂述舊聞多裨考證詩話一卷不甚
當家而邵二雲題後云南濠舊話新傳得吳下風流
楚地聞我是間官忙裏過湖山回首遠思君亦許其
網羅舊聞
之勤耳

渡桑乾

西風早蕭蕭催我玄鬢皤祇役發皇邑川原屢經過金龍池
畔水演作桑乾河東馳入滄海浩蕩成洪波誰知稽天流發

源始盈科覽茲感幾事防微當若何

張鳳翔 一首

鳳翔字光世洵陽人弘治己未進士除戶部主事有

伎陵集六卷

列朝詩集光世詩信手塗抹不經師匠如村巫降神之語而獻吉作傳以為子安再生文考復出關中人黨護曲論不惜人嗚噓皆此類也
靜志居詩話伎陵集洵無足錄牧齋謂獻吉黨護作傳然其集本獻吉評點初不假借不以為近俳即以爲太實黨護之論殊不其然
田按光世沒楊邃庵屬邊庭實整頓遺集庭實覆邃庵書云光世詩文章雜無序脈絡難尋若理亂絲之糾結極力整頓各依體製釐爲六卷今所傳伎陵集蓋庭實所訂也獻吉爲作佳傳而又於伎陵集指謫其失一以殉友誼一以著公評我輩今日取伎陵集而評騰之早已墮獻吉彀中

湘妃祠

虞帝南征不復歸湘君日暮嗁青衣秋風娜娜湘水冷愁雲
化作清霜飛清霜著草草欲死著竹竹黃印斑紫蒼梧雲色
凝不流夫君渺渺雲上頭曼聲浣月正愁絕何處雌凰聲不
歇蟠龍起舞潭水波幽吟咽咽生盤渦癡雲作雨老天泣竹
中奈此雙愁娥

陳伯獻 二首

伯獻字愔賢莆田人弘治己未進士歷吏科給事中

以忤劉瑾削職瑾誅起廣西提學副使有峰湖集

蘭陔詩話峰湖居諫垣日因疏逆瑾罪削職瑾敗起視學粵西以母老乞歸結茅蓮花峰下游情藝苑興致翩翩畫宗摩詰詩品在錢劉之間

登雨花臺

帶郭林巒屬上方寶幢說法事茫茫荒臺僧去天花盡古殿
春來貝葉香煙散江關開楚越劫餘碑誌認齊梁茗新泉冽
能留客細炷爐熏話日長

分守到廉州途中書事

計日星輶度遠岑西風旅思費長吟山多不礙歸家夢地僻
長懸戀闕心嶺外草黃生毒瘴海門日出破層陰還珠合浦
留清譽誰識遺殃直到今

李廷梧 一首

廷梧字仲陽莆田人弘治己未進士授桐鄉知縣入
爲御史進大理寺丞有壺塘集

送人休致

漫將春浪浣塵衣天馬如今不受鞿旅客豈堪千里別故鄉
初見一人歸薰風驛路黃鸝語細雨湘雲紫蕨肥回首都門
聯舊侶江湖應有寸心飛

程銓 一首

銓字瑞卿永康人弘治己未進士官四川副使

秋夜

砌冷草蟲喧月明如積雪美人不可期空林墮殘葉

胡文璧 一首

文璧字石亭耒陽人弘治己未進士授戶部主事歷
員外改監察御史進太常少卿出爲鳳陽知府改保
定遷天津兵備副使以事下獄謫延安檢校起四川

副使

鹿歧晚渡

鹿歧官柳晚煙凝十里蒼茫野色澄沙嘴喚船歸渡客嶺頭
持鉢入雲僧城樓隔岸傳昏柝漁艇連江起暮燈天畔一輪
新月上泠泠冰玉洗棱層

...

...

...

...

...

明詩紀事

貴陽陳田輯

丁鑑

游潛 二十八首

潛字用之豐城人弘治辛酉舉人官賓川知州有夢

蕉存稿四卷

夢蕉詩話昔予守賓川夷賊倡獫諸郡咸弗靖撫鎮
檄予以兵時有忌者摺撫以罪疏之乃還即故居鍾
山之麓小橋流水結茆數椽以託嘯傲距其前若百
步關小徑縈紆以入署曰蝸道記以吟云苔砌傍雲
行宛轉老將雙屐恰能容年來頭角從深縮不當人
間捷徑通次為門壘土踟躕署曰燕圖記以吟云重
門深壘如陶益四壁芹香一聚泥自信遺謀足安好
柳塘花鴨趁雛飛中為室積書萬卷與弱兒聚處署
日蟻封記以吟云得閒盡棄平生智老去羞稱善戰
家回首槐安應失笑一拳臺宇長官衙室之左罅置

小榻時自軒臥其上署曰蟻所記以吟云是非榮辱
忽推枕笑殺東家春夢婆滿屋山雲煖於絮蘧蘧清
思一吟窩室之右罅啟牖設案課弱兒以筆硯署曰
蟻區記以吟云閒情盡付蒼黃外伸屈無端信寓形
莫惜如蠶終底用喜無身後繭絲名室之最後爲小
亭窗戶靜朴環植芭蕉如幄朝夕偃仰視天下得失
之故灑如也署曰夢蕉亭記以吟云芭蕉十丈屋如
斗明月清風誰主人受用平生呂公枕悠然身世此
浮雲

獨眺

野風秋浩浩落日晚依依江入寒雲盡天隨去鳥低遠意窺
三楚愁心歷九嶷空城留鶴語千歲幾來歸

月下小酌懷李東白

團團古明月照我掌中杯良夜苦難再高人期不來山川何
糾繆雲樹重徘徊一別三年夢秋風易水臺

新春久雨

十日九風雨江村氣似秋陰雲接地暝野水貼天流破屋牀
牀漏空階滴滴愁謀生蓑笠在長嘯付扁舟

散步

白頭高帽青山客勝日行吟楚水涯宿雨野田初試犢煖風
城郭半開花喜聞社鼓喧村舍狂脫春衫付酒家百畝尙餘
身復健不妨隨分課桑麻

記舊

竹裏行廚松外樓錦江春色記前游藤蕪曉雨溼蝴蝶楊柳

晚風吹栗留芳草欲迷盤馬地好花偏趁少年頭醉歸青瑣
沈沈夜十二珠簾不上鉤

小亭寫意二首

平沙宿雨歇布穀鳴西畦山雲白縷縷江樹青離離
空庭深晝寂苔色淨於染草堂人不來竹門風自掩

遊仙詞二首

華蓋山前躡紫霞香風吹雨溼松花洞門白石高於屋再過
浮邱道士家
兩兩青童吹紫笙蕭蕭琪樹起秋聲海光倒浸壺天碧十二
闌干空月明

梅花

瑪瑙坡前落木風淡煙和月夜朦朧蹇驢踏遍湖邊路春在
野橋流水東

江行二首

藤花壓樹晝冥冥十八灘頭白漲平獨棹吳船歌楚曲滿山
風雨鷓鴣鳴

山木龍嵒啼杜鵑唱歌打鼓下灘船向人指點南來路百尺
懸厓一綫天

別江夏李凌霄郡博

去住真如踏雪鴻兩年情事一樽同明朝又是思君路黃葉
溪山落照中

無題

丁鍾卷九
竹枝蕭索柘枝殘楊柳池塘怯夢寒一曲吳歌數聲櫓月明
人已過長灣

遊明水寺

石門西望樹橫斜茅屋疏籬八九家鸚鵡交交田水滿一林
風雨落藤花

夢蕉亭獨坐

松下清風不費呼溪邊明月照人孤數椽茅屋青山裏一幅
閒雲野鶴圖

送羅浮道士

羅浮道士盧復春前身笑是黃野人偶然失腳出巖谷來踏
洞庭湖上雲

五羊寫興

夾岸芙蓉秋滿汀竹籬風颭酒旗青船頭獨坐看明月詩在
坡翁海上亭

江行

野樹冥冥花作團小風吹雨溼江干誰家茅屋溪聲裏門掩
薜蘿山色寒

蕉亭閒坐

鶉鴣啼倦野棠陰漠漠茶煙白晝深興味如僧心似水溪山
隨處是東林

有所思二首

羅浮仙子鬢如鴉爛漫行春過酒家腸斷江南又江北晚風

吹盡海棠花

青樓歌舞看花時
玉色參差照酒卮
搖落東風鷓鴣語
歇一簾香夢雨絲絲

舟中口占

篷外好山無數青
打篷時有浪花鳴
雙飛白鳥出復沒
拍拍滿江春水生

寄吳上舍

江城五月楝花寒
小雨輕風十八灘
白髮蕭騷山色裏
爲君惆悵獨凭闌

泛湖

野湖春盡水如苔
風雨能容一棹來
我是蓮花新博士
寄言

鷓鴣鳥莫多猜

竹枝歌二首

荷葉團團蓮子香
子魚風引藕絲長
船頭花開照人面
船尾阿儂愁斷腸

木蘭船高水滿湖
南風冉冉錦平鋪
賣酒誰家楊柳岸
小姬十五慣當壚

月潭上人卷

月在青天水在潭
月光潭水靜相涵
一塵不到空明處
我欲無言君試參

陳則一首

則字養新番禺人
弘治辛酉舉人
除定州學正
歷國

子學正博士遷御史加光祿寺少卿致仕有集

珠海

碧樹煙樊鬱浦東玻璃光漾蓋珠宮蜃樓海市疑天上絳闕
祇園入鏡中楊柳綠深漁艇笛木棉紅脫酒帘風三城縹緲
鵝湖闊煙雨微聞隔浦鐘

符錫二首

錫字宜臣新喻人弘治辛酉舉人授韶州判官累遷

太僕丞出為韶州知府

夢蕉詩話新喻符宜臣子鄉舉時同年友也力學苦吟尤癖於結字甯濠方蓄異志動以禮幣鉤致賢俊欲為之用或以宜臣言者屬所親作詩諷以意宜臣用韻答之曰羹藜弗充虛厚味乃醜毒薦稿豈潤榻芒刺生重褥怡曠易處心牢籠豈煩促原獸走索羣山禽鳴待旭退想塵慮消長歌振林曲卒能自保以

成其志其視素擁虛譽終不免於天下後世戮且笑者不可同日語矣

雲峯居

妍彼湖上峯白雲護其端好風忽相逐暫住輒復還達士美
幽蔭逝將此盤桓日月自相促山中有餘閒仰盼出林翮退
哉安可攀

憩晚翠書屋

漢代有佳人寄迹鴻山下繞屋哦青松琴樽有餘暇寒日落
高陰清風起長夏此意竟蕭條行當息吾駕

趙善鳴一首

善鳴字元默廣州順德人弘治辛酉舉人官曲靖知府有朱鳥洞集

珠江七夕別覺山洪侍御

黃木灣頭秋水清美人江上挂帆行尊前莫惜此回醉別後
有懷空寄聲珠海月明仙舫並銀河星爛鵲橋平人間天上
團圓會不道明朝兩地情

鄭鵬 一首

鵬字于漢閩人弘治辛酉舉人除淮安教授有編茗
集

題文徵仲小景

竹橋橫小澗泉響落空山惟有幽棲客扁舟恣往還

李廷相 一首

廷相字夢弼濮州人弘治壬戌第三人及第授編修

改兵部主事歷員外郎中復改編修歷中允侍講學
士擢南吏部侍郎改兵部禮部進戶部尚書加太子
賓客贈太子太保諡文敏

秋日

宦思隨秋薄幽懷對酒寬晚涼貪露坐明月上闌干

魯鐸 七首

鐸字振之景陵人弘治壬戌進士改庶吉士授編修
歷司業進祭酒諡文恪有集十卷

田按文恪清節名德為六館師範詩存樸質而時有
風趣譬之老樹著花亦饒姿致

送吳景陽國賓還荊州

儒林爭識面戚里舊知名狎客清狂甚耽詩太瘦生使星臨

魏闕鄉夢落江城去去無窮樂東平好舅甥

益陽道中

益陽南下山岩堯益陽道傍風物饒翠竹丹楓映茅屋清泉
白石臨溪橋異禽時出語歷歷寒花自任風蕭蕭詩中有畫
見眼底右丞往矣誰能招

棹汀

幽人居棹汀汀戶相還往醉後棹歌回月照青蘋上

府江舟中

野堡明弓刀風船激笳鼓畏塗不成眠更聽江邊雨

草蟲

淑氣濃熏芳草晴絲不礙飛蟲春色都堪描畫無人畫得東

風

邀韋菴

南池北池凍初解紅梅白梅花正開弄水登臺無不可上元
風日待君來

安道鋪

安道郵亭獨倚闌好山無數夕陽殘何因更借明朝住藜杖
延緣盡意看

周用

十三首

用字行之吳江人弘治壬戌進士授行人擢南兵科
給事中改禮科復改南兵科出爲廣東參議歷浙江
山東按察副使福建按察使河南布政使以右副都

御史巡撫南贛召協理院事擢吏部侍郎改南刑部
就遷右都御史工刑二部尚書致仕起工部尚書督
河道改漕運召拜左都御史加太子少保進吏部尚
書贈太子太保諡恭肅有恭肅集十六卷

四庫總目用詩近體頗宏整

靜志居詩話白川十齡能畫長師石田翁得其指授
詩則別裁風格取法杜陵集中詩云畫品仍遊藝詩
家特擅名丹青乃餘事金石自希聲散地方盤礴諸
公孰老成朝川稱二絕早晚慰平生蓋以摩詰自喻
也余嘗見公畫龍戲浪穿山蜿蜒升降百年絹素雲
霧猶溼至寫平坡放犢亦不減史道碩厲歸真乃知
公藝事兼能不惟以經濟文章重也
田接尚書七言近體頗擅風格絕句尤有丰致

蒼梧城樓

迢迢河漢臨飛樓何年天險開炎州韶石亭亭鳳鳥去海門

宛宛蛟龍遊宋帝樓船非故國越王臺殿餘荒邱蒼梧雲暮
一回首炯炯月出城東頭

匡山二首

岡州行殿火飄紅井澳樓船苦北風猶謂夏康能復國可憐
劉禪已封公漫山春草珠禱冷卷地胡塵玉帳空千古亂階
誰復問直尋國史到元豐

宣和容易誤亡遼卻向天南寄九朝忍見黃衣淪碧海猶聞
白屋怨青苗玉魚墮地迷秋草鐵馬橫沙落暮潮帝業艱難
餘涕淚黃埃無處望陳橋

石田沈史像圖

蕭然邱壑在眉端林下人從壁上看白髮信誰修野史青衫

從爾授園官雙魚落手春坡遠四座驚心夜語闌盤薄尙須
勞畫者休文詩骨不勝寒

送禮部陳子引父還江南

都門羸馬載青袍爲客經年感二毛東郭煙霞陪我老南宮
文采付兒曹風前落木蒲帆急江上孤城鐵甕高鄉國有人
憐倦翼秋深短鬢不禁搔

清涼山寺

行庖酒煖登清涼此生此樂殊未央謾行四百八十寺須醉
三萬六千場西風野樹黃葉滿南國詞人白髮長問渠明日
有高興還訪鍾山舊草堂

嘗雞頭

誰問雞頭當鵠頭品題自我等名流平生芒刺甯終老此日
泥塗幸早收稅畝未修河伯怨食芹應重野人憂江湖到處
無知己若箇明珠可暗投

題畫

楓葉野亭陰蘋花沙岸雨秋光絕可憐誰與幽人語

嚴陵灘

灘水清復深飄颻歷虛館我愛先生魚天寒釣絲短

聞居

背擁重衾客夢賒隔簾清曉有啼鴉東風未埽牆隈雪半面
春寒索酒遮

題畫

空江綠水淨孤篷隔岸桃花看小紅祇恐春愁易寥落獨持
杯酒慰東風

題扇

客程子夜聽吳歌夜雨南塘促芰荷欲問西風來早晚白團
明月奈秋何

曾仲仁墨梅

自憐官閣少詩流春信相將寄隴頭一種孤窗明月夜直飛
清夢到衡州

徐問 六首

問字用中武進人弘治壬戌進士授廣平推官遷刑
部主事歷兵部郎中出爲登州知府改臨江歷長蘆

鹽運使福建參政廣東布政使以右副都御史巡撫
貴州召拜兵部侍郎改南禮部進南戶部尙書謚莊
裕有山堂萃稿十六卷續稿四卷

靜志居詩話尙書五律清高深穩
田按莊裕撫吾黔時與黔人講學著讀書劄記八卷
能以儒術潤飾吏治其論詩云弘正間李何王三子
起於北徐子起於南肆筆覃精馳騁跌宕力追漢魏
遠軋風騷其律則幾於杜矣然感思沈鬱少戾性情
唯白沙定山不拘體裁觸物成聲因言見性辭弗求
盡識則超然故其早歲所作頗講格律晚乃專宗陳
莊山堂續稿中有句云近得定山詩樣子闐然吹我
到無懷乃頽然自放矣

過釣臺

野雲初出浦積雨漸收時木落桐江水山迴釣客祠高臺干
古在遺像後人思亦有漁樵意臨流莫廢詩

池上酌

故人尊酒至愛此林塘深竹色照杯尊清風生葛襟寡營庶
怡靜與子俱遠心因之暫遣俗無勞爲相尋

朱得之過訪山居不遇

東湖有真隱來訪北山隅采藥歸何暮迴船興已孤晚霞明
竹樹秋水浸菰蒲爲問山陰意于今憶戴無

林郎中方副使留參政同登鼓山

梯雲穿石徑浩蕩接天風樹色浮窮島鐘聲落半空平生幽
興極清賞幾人同異日懷三子居然說灑東

龍門驛

險仄灘江峽龍門驛路通軍麾沙水上春色瘴煙中深樹埋

豺虎窮荒絕雁鴻天山勛亦好吾欲挂雕弓

倒口暮歸

水深臥蛟湖風急倒岸口日暮懷孤征惻惻空回首

李時一首

時字宗易任邱人弘治壬戌進士改庶吉士授編修
歷侍讀右諭德侍讀學士擢禮部侍郎改戶部復改
禮部進本部尙書改吏部歷文淵閣謹身殿華蓋殿
大學士入參機務屢加太子太保少保少傅太子太
師贈太傅諡文康有薇花堂稿

列卿紀嘉靖十二年帝幸南內召張孚敬李時方獻
夫翟鑾同遊西苑製古樂府七言五言各二章命和
十三年五月上幸南內召孚敬時同閱青爵尊賜扇
及酒食閱宣宗輿地圖詩及御和詩十四年三月召

同遊南內時等各作奉制記樂賦以獻帝亦作一詩
命曰御製記樂同遊刊示羣臣十五年五月召時同
夏言郭勛泛舟西苑命蕩槩近龍舟被顧問賜宴無
逸殿翌日時等表謝以爲自宣宗賜蹇義同遊萬歲
山楊榮同遊西苑後今僅再見云
田藝蘅留青日札嘉靖十二年四月十三日上演馬
南城召大學士張孚敬李時方獻夫翟鑾同遊環碧
殿嘉樂館錫宴重華殿賜孚敬麟服時等飛魚服上
賜律詩二首紀之羣臣應制奉和張公句云環碧殿
前先試馬蒼龍闕外更觀花李公句云內苑草茵迎
玉輦行宮花氣襲雕鞍翟公句云巧剪緋羅纏寶鏡
分題玉篆佩花駉方公句云應制漸無天馬賦南薰
惟誦舜廷歌

城南蕭寺呈同遊

出郭林泉已自幽更從山寺坐高秋迴廊寂寂寒花放野日
荒荒宿靄收興到登臨增感慨酒忘賓主廢交酬城中亦有
消閒客車馬誰從此地遊

林茂達一首

茂達字孚可莆田人弘治壬戌進士官南大理寺卿
有翠庭集

次鄭山齋韻

小有林泉數畝園興來時自命琴樽白雲滿地無行迹松月
當階鶴候門

王尙綱一首

尙綱字錦夫邠人弘治壬戌進士授兵部主事改吏
部歷員外郎中出爲山西參政改四川陝西遷浙江
布政使有蒼谷集十二卷

田按錦夫與李何遊苦意追摹合作終鮮

送王掌教至安陽

憶昔親相餞承恩復此行
郊山愁對酒
鄴柳正含情
宮瓦龔芳硯
春波浣舊纓
詞華慙數子
禮樂待諸生

陳霆一首

霆字聲伯德清人弘治壬戌進士
歷刑科給事中謫

判六安州歷山西提學僉事有水南稿十九卷

四庫總目霆詩意境頗為蕭灑而才氣全涌信筆而成
故往往不暇檢點惟詩餘一體較工其豪邁激越有
蘇辛遺範未附詩話一卷中間論詞一條謂明代騷
人多不務此間有知者十中之一二則其自負亦不
淺矣

陳霆兩山墨談六安茶為天下第一有司包貢之餘
例餽權貴與朝士之故舊者玉堂聯句有云七碗風
清自六安每隨佳興入詩壇纖芽出土春雷動活火
當爐夜雪殘陸羽舊經遺上品高陽醉客避清歡何
時一酌中冷水重試君謨小鳳團觀此則一時賞重

可知矣予謫宦六安見頻歲春凍茶產不能廣而中
貴鎮守者私徵倍於官貢有司督責頭芽一斤至賣
白金一兩山谷窳民有鬻產賣子以買充者故茶在
六安始若利民而今為民害則甚漢武帝南巡以衡
山遠阻不及登燎即州南之霍山行禮遂封為南岳
山有漢時拜郊臺凌霄樹宦遊其地者每縱登覽以
快一時之觀然而供給飛輓山民告病久矣正德辛
未予召還秋曹朝除以江右劉某者為守劉起家舉
人臨行請益子贈之詩云踏槐會作少年遊高入青
冥一鶚秋匣劍久韜冲斗氣郡符新下夢刀州雨前
網茗春陽早笏外南山爽氣浮相送一言煩記取大
廷方簡富民侯

墨布袍

墨布袍粗且黑心中事背上墨宋時遺黎元
版籍寒暑晴雨

甯暫釋直教蓋棺覆我首領纏我骨死不在閩
廣生苟依木

石安能易彼章與黻俛首躬身福州伯

靜志居詩話水南博洽著聞留心風教詩不苟作墨
布袍者宋咸淳進士福建提刑德清游汶魯望所服

元初以遺老薦授福州總管固辭不就題袍背云前
宋遺民今爲百姓雖雨晴寒暑未嘗解脫卒葬果山
此事國史失載因具詮之

孫偉 二首

偉字朝望清江人弘治壬戌進士授南工部主事歷
郎中出知鶴慶府有鷺沙集

田按鷺沙詩頗似宋人江湖小集

遊北園

野趣黃雞酒從君棗樹林熟歸憐老馬交語愛鳴禽野色明
餘照
結暝陰鷗波自千尺不及此杯深

題清碧野人

難老堂中景自寬水山長與客相干綠嵐半嶺秋光溼明月

一江松影寒何處滄浪唱洲渚暮年詩句有峰巒遊魚歸鳥
天機熟并入幽人靜裏看

雜畫

村曲閒門面石開青山如畫水如苔白雲久作孤舟伴流過
青溪渡口來

范嵩 一首

嵩字邦秀甌甯人弘治壬戌進士累官南工部侍郎

有衢村集

送向太守中美之廉

夜火洲邊驛鶯花白下春一尊須判醉明日異鄉人

金賢 一首

賢字士希江甯人弘治壬戌進士除仁和知縣入爲
兵科給事中出知大名府改延平

贈劉松隱

松隱先生屏俗緣三層高閣詠遊仙我來不解琴中理但乞
松風白晝眠

潘希曾一首

希曾字仲魯金華人弘治壬戌進士選庶吉士授兵
科給事中改吏科以忤劉瑾繫獄予杖削籍瑾誅起
刑科給事中改禮科遷工科都給事中歷南太僕少
卿進本寺卿就遷太常卿改北以右副都御史提督
南贛汀漳軍務召拜工部侍郎改兵部贈尙書有竹

澗集八卷

山中

山日欲落未落梅花一枝兩枝悵望幽人不見碧溪流去多
時

(Faint bleed-through text from the reverse side of the page)

明詩紀事

貴陽陳 田輯

丁籤

董玘 一首

玘字文玉會稽人弘治乙丑第二人及第授編修以
忤劉瑾出為成安知縣遷刑部主事瑾誅復故官歷
侍讀左諭德侍講學士遷詹事兼學士進吏部侍郎
有中峯稿六卷

彭城有懷

清夜棹歌發高秋客思生綿綿鄉國夢歷歷水雲程老樹危
蟠石衝波怒齧城白門樓上月偏傍海東明

顧應祥 二首

應祥字惟賢長興人弘治乙丑進士歷官南刑部尙書贈太子少保有崇雅堂集

田按吾黔安莊白水瀑布不減廬山三疊尙書官旗藩時取道於此有句云青天作雨千蛟舞白日行空萬騎屯砰動雷聲山欲裂撼搖坤軸地應翻差足得其彷彿也

宋駙馬王誥江山勝覽圖

王郎妙手絕代無生綃寫出江山圖飛揚天趣入三昧點染
意象爭錙銖遠山模糊近山碧澄江一帶生秋色老樹參差
曲岸通回波搖蕩崩隄仄人家臨水盡開門似聞雞犬聲相
喧萬杉路隔煙霞洞獨木橋通楊柳村忽然突起作險狀兩
崖怪石森屏幃峰回麓轉勢復平賈舶漁舟互來往樓臺隱

隱雲中起疊嶂層巒青未已風帆渺渺天際來咫尺應須千
萬里

歸雲菴次韻

千峰萬峰嵐氣霏松陰曲徑開禪扉虛空小坐羣動息空山
無人俗事稀清泉出渠忽自響野鳥狎客如相依眼前幽意
收不盡斜日看雲徐步歸

張邦奇 八首

邦奇字常甫鄞人弘治乙丑進士改庶吉士授檢討
出爲湖廣提學副使改四川福建入爲右庶子遷南
祭酒擢南吏部侍郎召拜吏部侍郎歷掌翰林院詹
事府事加太子賓客進禮部尙書改南吏部就改兵

部贈太子太保諡文定有觀光樓紆玉樓四友亭養

心亭靡悔軒環碧堂甬川等集

田按尙書提學湖廣時世宗在潛邱就試學使以此受知帝奉太后謁天壽諸陵語及擇相太后曰獻皇嘗言提學張邦奇他日可爲宰相其人安在帝憬然曰尙未用也卽召爲吏部侍郎會以母老便養收南京帝念邦奇不已與分宜語及之分宜以邦奇至孝母老不樂北來對遂終不召卒後閣擬諡文恪文敏帝抹去四字大書定字遂諡文定廟堂制作頗稱莊雅觀光樓集日樂章僅列秋享上帝祀皇天上帝二章後人不知妄將洪武及嘉靖時改製樂章一切闕入集中後之讀文定集者所當知也

苦雨

孟夏乃淫雨朱光轉淒其出門泥淖深平疇漫成池雨龍一
離窟凝雲挾遨嬉淫淫翳空下滔滔無厭期吁嗟望歲心閔
閔誰能知

蟠龍山

登蟠龍兮高絕塵十轉百轉回回新小橋巖壑迸流水中有
石室居仙人斜陽在樹白鶴鳴長峰短峰殊晦明須臾洞口
陰風起吹作瑤空飛練聲

恭輓孝康敬皇后 二首

鼎湖龍馭遠華表鶴歸悠夕露青天泣秋陰碧海愁四朝看
盛美七秩享康休社飯重分日臣工涕泗流
露有重晞日山無復返泉運當開燄日功翼燕皇天蘭殿雲
如結金鋪月自圓遺言懷聖孝恭誦一潸然

恭輓慈孝獻皇后 二首

睿廟勤家日休聲萬國聞嗣皇膺景命母教翼鴻勳合葬遵

前古尊稱據典墳共嗟天子孝風木淚紛紛
豐碑樹南紀祥霽護仙宮湘竹今無淚橋山舊有弓世傳遺
誥滿人仰德音同望望颿車遠松楸感帝衷

寫懷

四月江皋雨乍晴芳塘一畝鑑空明興來時復麾談塵愁破
無勞動酒兵柳外餘春鶯獨轉花陰遲午鶴雙鳴太平風景
村村樂閒看秧苗得意生

白溪道中

十日春風迸草芽竹根穉笋露平沙巖巒孤立清溪瘦上有
野梅橫數花

徐縉 六首

縉字子容吳人弘治乙丑進士改庶吉士授編修歷
官吏部侍郎兼學士贈禮部尚書諡文敏有集五卷

司勳集公與李何特相友善朝夕揚推往復譏彈每
有撰述輒爲嘉賞
田按文敏五字詩音節瀏亮頗近邊華泉

贈薛君采

端坐苦無悰秋氣況蕭索清霜被玉除涼風吹紫陌感茲道
路長言念東歸客浮雲蔽日光流潦成川澤相期渺關河行
矣慎所適

春日憶李子

吾愛空同子飄蓬似謫仙達觀塵世外幽討白雲邊盤石藤
蘿月夷門楊柳煙相思不可卽東望轉淒然

冬夜與原德節夫燕集

夜闌來索酒笑我太粗豪良會苦難值病軀方告勞青燈仙榻靜畫角禁城高聆爾陽春曲真能瀉鬱陶

送劉德徵之夔府

五馬分符貴孤城作鎮雄巫山峰十二灑水澗西東政繼劉郎蹟詩追杜老風江關千萬里把酒意何窮

送郭司業介夫

翰苑名元重成均位不輕青霄瞻奮翮碧草動離情日月新明主江山舊鎬京他年歌樂育師道說陽城

中秋日虎邱待月

待月虎邱岑行歌芳樹林玄雲催落景青靄結重陰古徑莓

苔色荒臺鴟鳩音高人在何許悽愴獨傷心

殷雲霄 十五首

雲霄字近夫壽張人弘治乙丑進士授靖江知縣改

青田擢南工科給事中有石川集五卷

崔銑洄詞近夫修眉碧日口可容拳體羸而骨健讀書數行下作蓄艾堂聚書數千卷思欲以作者自名以詩者抒情表志風人於善自漢魏至唐作者皆辨其音節而擬之

藝苑卮言殷近夫詩如越兵縱橫江淮間終不成霸海岳靈秀集石川天資豪邁著述甚富海岳之靈氣

也國雅殷給事近夫菁藻時髦才情道麗如波喧偏怒

石山暗欲生雲溪靜干峰倒雲歸眾壑昏又狂龍歌舞晚潮外芳草歷亂新晴中稍得鳳池一毛龍淵片

甲田接近夫好古振奇豪情健句雜沓而來古詩稍落痕迹七律學杜拾遺不失為陳正字也

金田山

雲峰既合沓石徑亦曲折曉行霜露重葉墮寒潭潔奇石立
且仆洩雲去還結小住愛窈窕遠眺得奇絕山水適夙志草
木悲暮節紛紛搖落中殘菊尚可掇

雜詩

終日抱膝坐門前無來客所懷不可忘脈脈念疇昔登高而
遠望雲霧塞八極離禽飛且鳴孤蘭慘無色晤言思親友日
暮空歎息

聞太初出遊

江風散微雨重峰生遙碧林端浮新青梅徑見殘白煙水澹
孤城齋閣坐成夕忽念同懷人清光隔咫尺溪舟時載酒野

步或攜策靜躁心詎異寤歌聊自適

秋雨歎

陰雲伏雨回秋光病骨卻愛秋風涼杖藜高歌猶清狂南歸
鴻雁鳴且翔我欲射之心悲傷嗚呼歲暮山中人未歸山中
茅齋今是非

石門懷太初

舍棹緣芳澗披蘿入石門秋風正蕭瑟林木亦飛翻溪淨干
峰倒雲歸眾壑昏佳期曠何許獨酌念彌敦

桃花

清源柳葉短東昌桃花開暝色春雲澹悠悠鳴雁哀浮名知
是幻薄宦愧非才萬里滄溟水蓬萊安在哉

秋郊

今日忽不樂，帳然歌式微。來游荒野大，坐覺晚雲飛。秋葉不相待，海潮空自歸。憑誰問所往，寂寞故人稀。

九日登混元峰

孤杖千峰病起時，江山如此更何之。三年奔走風塵暗，九日登臨草木衰。樽酒相逢人去遠，鄉書不至雁歸遲。八溟秋色真寥廓，極目蒼雲有所思。

東昌道中

繫帆潞河冰橫道，東昌楊柳何青青。鞦韆村落清明近，過客心情涕泗零。鳴雁遠天雲漠漠，桃花野岸煙冥冥。停舟正爾覓芳草，風吹波濤愁晚汀。

寄孫太初

不見高人孫太白，採芝深山誰與歸。思君每傷碧雲合，爲客不覺黃葉飛。石門雁宕空有約，美酒新詩終日稀。歲莫梅花怨幽獨，桂棹東來安可違。

富春山二首

子陵祠屋碧崔嵬，細雨扁舟此日來。山色不隨炎漢去，潮聲猶帶伍員哀。一時圭組憐英俊，萬古風雲閱草萊。何限幽懷無可問，海天逸鶴幾時回。

富春山上雲蒼蒼，子陵墳前江水長。百戰韓彭無葬地，千年樵牧有椒漿。絕巘寒風吹短鬢，長波落日動孤航。多懷欲采芳洲薦，楓葉蕭蕭天雨霜。

下邳見山

過江以北不見山今朝蒼翠落潺湲平生自是煙霞客出宰
况居山水間芳草可憐春欲暮白雲應恨鳥知還推篷把酒
風塵道愧爾相看猶故顏

南旺道中柬徐掌科尹大行

夜雨既過無塵土芳草微煙亦可憐白雲欲去青山遠鷗鳥
似矜湖水妍平生事半風塵裏兩年歸俱清明前楊柳岸頭
春幾許與君沽酒問漁船

次繼之戶部九日見示詩

病起杖藜時極目何處人間千仞岡滿天風雨木搖落萬里
煙波江渺茫况逢佳節菊盈把不見美人天一方南北干戈

尙未息獨吟安能寬我腸

安磐 七首

磐字公石嘉定州人弘治乙丑進士改庶吉士授兵
科給事中進都給事中議大禮被杖免官萬厯初追
贈太常少卿有游莪集頤山集

四庫總目安磐頤山詩話二卷其論詩以嚴羽為宗其
議莊景溪邊鳥共天機語杖上梅挑太極行句論梅
堯臣歌欲論長恨人將問少君句及排周紫芝論林
逋梅詩可謂公論磐亦能詩故其評論古人多中窾
會蓋深知其甘苦而後可定其是非天下事類如是
也

升菴集明嘉州楊孟載青城王汝玉成菴袁可潛徐
遵晦富順晏振之近得宜賓牟君倫長
州安公石程以道卓然名家
升菴外集亡友安公石妙於集句以鱸魚正美不歸
去對瘦馬獨吟真可哀又請君酌我一斗酒與爾共
消萬占愁又梁間燕子聞長歎樓上花枝笑獨眠水

國蓮花府雲帆楓樹林又集杜句弔葉叔晦讀者為
之泣下其詩云臨江把臂難再得便與先生成永訣
文章曹植波浪闊死為星辰亦可滅老去新詩誰與
傳男兒性命絕可憐出門轉盼已陳迹妻子山中哭
向天中夜起坐萬感集人生有情淚沾臆鳳凰麒麟
安在哉石田茅屋荒蒼苔君不見空牆日色晚悲風
為我從天來
池北偶談安松溪升菴先生友也其詩風神獨絕而
世罕知之
靜志居詩話揚用修述公石論詩之旨云唐之名家
自立機軸譬猶羣花各有丰韻乃或剪綵以像生或
繪畫而傍影終非真也又云論詩如品花木牡丹芍
藥下逮苦棟刺桐皆有天然一種風韻今之學杜者
紙牡丹芍藥爾其說足以解頤

毗盧寺

孤城帶山雨石東滄江長涼月下蓮漏曉風吹竹房方外有
遺教空中多異香長齋詎空寂醉裏失仁王

峽中

六月瞿塘灩澦堆江流如馬刷雲來昭君村抱琵琶峽神女
祠連雲雨臺峭壁斷崖無鳥過古藤昏樹有猿哀夜來風雨
波濤壯消得夷陵濁酒杯

閒居

竹杖綸巾避俗翁閉門終日對寒松抱琴不是難成調流水
高山一萬重

遊凌雲寺 一首

青衣江上水溶溶隔岸時聞戒夜鐘暫借竹牀聽梵放月華

初上第三峰

林竹斑斑月上遲鳥啼花落暮春時青衣不是蒼梧野卻有
我眉望九疑

漁洋詩話余登凌雲石壁刻詩甚多惟安磐松溪四絕句甚工記其句云青衣不是蒼梧野卻有峩眉望九疑蓋峩眉三峰正直凌雲九峰之西中隔三江至其地知其詩之工也

白水普賢寺

紫煙花雨溼晴山已宿招提第四關橫笛夜深龍睡起斷崖懸石水潺潺

靈崖寺

落日西風入化城萬山回合一溪橫誰知今夜峨眉月高坐靈巖聽鶴聲

張鵬一首

鵬字起溟洪雅人弘治乙丑進士歷官山西巡撫謫漳州知府有北還集西巡稿

月珠佛頂

月珠古名籃草樹何葱蘢偶攜綠玉杖一上金仙宮石磴盤細雲衣袂吹長風峩眉弄秋色瓦屋凌晴空平羌水如練直下扶桑東疊嶺儼重城萬象開洪濛悠然俯闌檻宛在罨畫中多病久不出始覺神境融尊酒雜劇談况復陪羣公心垢忽以滅禪機坐能通乃知浮生勞百歲無時窮願結清淨緣何當謝樊籠

樂護一首

護字鳴殷臨川人弘治乙丑進士除宣城知縣改山陰擢給事中進光祿少卿兼掌欽天監事以言星變下獄謫知宿州歷河南僉事進陝西參政有木亭雜

藁

思家

溼雲暗重林悲風動高閣獨坐誚無言淚續檐花落

蔡潮

一首

潮字巨源臨海人弘治乙丑進士選庶吉士改兵科

給事中累官河南布政使

宿懷化驛

落日溪風急新春客袂寒蠻山隨澗轉驛舍傍雲看鳥已投

林盡人嗟行路難盤回心百折歇馬已更闌

易舒誥

八首

舒誥字欽之攸人弘治乙丑進士改庶吉士授檢討

以忤劉瑾改南戶部主事瑾誅復故官有浯池集二

十卷

田按浯池絕句風致翩翩

題畫

七首

細雨濛濛樹萬重繞村溪路紫苔封松巖定有幽人住知在

秋山第幾峰

攤書草閣林鶯囀隱几茅檐燕羽翻不為西山有懸瀑杖藜

容易過南原

縱橫籬落茅齋小委曲江干草樹空一葉孤舟向何處半帆

斜日半帆風

騎馬看山路轉餘草橋南畔日西斜倦來且坐溪邊石先遣

長鬢問酒家

曉起尋春一水遙夜來中酒未全消陰崖說有桃花片一路
鶯聲送過橋

清溪夜漲桃花雨春岸晴多楊柳風爲寄函書下揚子故人
多在石頭東

青山隱隱連天柱紅樹層層帶夕雲聞有肉芝如股大不妨
同問大茅君

新正

鄉村令節各匆匆又是相逢花柳中不及西泉閒太史年年
破屋領春風

陳錫 二首

錫字祐卿南海人弘治乙丑進士授戶部主事改吏

部歷郎中出爲福建參政進布政使擢應天府尹有
天游集

新秋登玄覽臺分韻得玉字

靡靡流火西鮮颯解餘燠奇懷邁良辰散步粵山麓林巒蔚
蔥蒨邱壑繚而曲振纓陟崇臺神情若新沐悠哉偕友朋適
意此盤谷徜徉四山暝日入歡未足秋聲動喬林流螢度疏
竹松燈奚待篝明月白爲燭眞樂同逍遙豈必驂黃鶴

登越王臺

百粵風塵迴登臨野色分牛羊散平陸狐兔穴荒墳舊壘寒
鴉集殘碑劫火焚青山故無恙鸞道杳秋雲

鄭銘 一首

銘字克信新會人弘治乙丑進士授戶部主事歷郎中出爲袁州知府有岡州近稿二卷使滇雜興九卷
白沙祠堂

崑崙萬丈來白龍一畝中有仙人宮草色猶餘楚雲碧蓮花別作濂溪紅客星無光塵夢遠鳳鳥不來吾道窮至今寂寞古祠下年年依舊自春風

蕭世賢 一首

世賢字若愚桐城籍本泰和人弘治乙丑進士累官按察副使

雨中舟行懷可泉

湖海斯人在遲回歲月移青山吳下夢細雨越中詩杉渚相逢處蘭橈獨去時春來思載酒雪上定相隨

陳鼎 一首

鼎字大器登州衛籍本宣城人弘治乙丑進士授禮科給事中以忤中官廖堂下詔獄釋爲民起故官出爲河南參議歷陝西副使浙江按察使進應天府尹
田按大器官黃門以勁直著詩特奇麗惜不多見

海市

凌虛入市何冥濛云胡獨見蓬萊東竹山妃子巧粧束翠屏金鏡堆芙蓉幾回梳雲鮫室暗有時浴日鯨波紅恍疑根著帶鼈極不然底柱檣龍樓居十二隔煙霧齊州九點攢神

工小兒造化只如此蘆灰色石非談空三山遙指亦有意桃
花未許劉郎通歸來几席有滄海終當稽首乘桴翁

穆孔暉 一首

孔暉字伯潛堂邑人弘治乙丑進士改庶吉士授檢
討以忤劉瑾改禮部主事瑾誅復故官歷司業侍講
庶子侍講學士尙寶司卿南太僕少卿進本寺卿贈
禮部侍郎謚文簡

國史唯疑詞林歲時會分韻唱酬趙大洲贈孫季泉
詩季子文章伯王孫忠孝家又穆孔暉題南司業郎
有書聲山下月詩思竹邊秋之句爲崔子鍾歎賞並
膾炙人口稱雅事今寥寥絕響數十年遂無談及可
歎也

送王侍講三錫出參蜀政

平生染翰青雲上今日方知行路難聞道華陽多勝概莫將
詩酒愛登山

劉寓生 一首

寓生字奇進石首人弘治乙丑進士選庶吉士改御
史以忤劉瑾免歸起福建僉事

儼山詩話同年劉奇進在同館中最年少疏宕有美
質試問雁詩奇進立就曰秋至人間增客思况聞秋
雁過皇都數聲到枕頻驚夢幾度穿雲不受呼自惜
短翎驚歲月可憐寒影遍江湖海天愁鬢那堪汝故
國音書知到無眾皆歎賞檢討汪器之曰詩甚佳須
作御史耳寒影遍江湖非御史何官也後竟授御史
出按貴州爲權姦所誣幸不死

六湖山

石林迤邐入平蕪萬疊青山繞六湖夾岸人家溪壩畫一隄

花柳錦模糊地連虎渡扁舟遠水落獅巖曉月孤好景欲同
鷗鷺狎片帆搖曳落菰蒲

黃鞏 一首

鞏字伯固莆田人弘治乙丑進士授德安推官入爲
刑部主事改兵部歷員外郎中正德中諫南巡予杖
削籍歸嘉靖初起南大理寺丞卒贈大理少卿天啟
初謚忠裕有後峰集

莆陽文獻鞏自題其書室曰茅屋石田爲生大拙鳴
夷馬革自許何愚蓋有志殉國也武宗南巡鞏疏六
事言極痛切車駕員外郎陸震見其疏願同署名以
進疏既入杖百餘除名陸竟死鞏體極修羸幸得甦
以詩遺弟曰不用汝謀方至此須知臣道固當然蓋
萬死不悔也鞏嘗言曰人生仕宦至公卿大都不過
三四年十年惟立身行道爲千載不朽世之人往往以
彼易此何耶沈敏好學詩文清粹和婉幾自成家

東南嶠外詩話忠裕集中待罪句云半生今許國萬
死敢祈恩罰跪送鎮撫司句云自託匡時略翻成出
位言偶成詩云罪當萬里投荒服恩許終身作布衣
絕無怨懟其所養可知矣

仲春寫懷因寄夷陵林以乘

竹下花前漫酒尊不知今日是春分金華

陸汝亨鎮

老去夷陵遠

望極江天空暮雲

孟洋 四首

洋字望之信陽人弘治乙丑進士除行人遷御史坐
論張璉桂萼下詔獄謫桂林教授遷汶上知縣歷嘉
興同知擢湖廣僉事改山東進參議歷陝西參政拜
僉都御史巡撫甯夏改理河道終南大理卿有有涯

集十七卷

藝苑卮言孟望之如貧措大置酒寒酸淡泊然不置
醒壇
靜志居詩話左孝廉舜齊獻吉外弟也孟大理望之
仲默外弟也左詩近膚孟詩太淺比於郎伯邈若雲
淵

顧全州見邀江水漲不能赴

桂林山深晝啼鶉一春三見紅日出鳴雷達曙雨浪浪洪潦
平階仍入室美人只在水一方百遡千迴道轉長雨中空見
枇杷落飛盡楊花更斷腸

別胡茂卿推府往吳興兼呈劉養和太守

吳興非遠別客路亦關情細草迎船發春雲對浦生西亭饒
柳色茗水試鶯聲謝傅仍爲郡登山擬共行

寄周充之侍御謫居南海

君從嶺海駕輕舟余亦瀟湘溯碧流悵望雲天俱墮落相思
月夜一登樓魚龍巨浪春應動瘴癘深山雨更愁飽食殊方
各努力南中山水足遨遊

回雁峯

回雁峯高起夕嵐孤舟落日繫江潭雁知瘴癘愁南渡逐客
明朝路更南

索承學二首

承學字遜夫邳州人弘治乙丑進士官戶部郎中有

桐岡集

閨怨

行人瞻遠途飛鳥巢舊枝人去日已遠鳥歸恆有期坐令歲

華晚空調鉛粉姿思君如逝水一去無還時

折楊柳

楊柳風微三月時行人立馬醉金卮憑君試看河邊樹春去
春來只舊枝

周宣一首

宣字彥通莆田人弘治乙丑進士除常德推官擢監
察御史諫南巡被杖不死出爲山西副使遷廣東按
察使進布政使有秋齋集

黃岡驛阻雨

阻雨黃岡驛行旌去復留浮蹤何必問明日是潮州

田登一首

登字有年長安人弘治乙丑進士授刑部主事歷湖
廣僉事山東副使進河南參政

巴東峽中

去時冰雪寒歸來桃李豔短棹羈春愁雲深江路暗

方獻夫一首

獻夫初名獻科字叔賢南海人弘治乙丑進士選庶
吉士授禮部主事改吏部進員外郎以議大禮擢侍
講學士歷少詹事拜禮部侍郎改吏部進禮部尙書
改吏部加太子太保柱國少保兼武英殿大學士贈
太保諡文襄有西樵遺稿八卷

駕遊環碧演新乘馬應制

白馬黃金勒霓旌天上來君王政機暇柳彈金鞭迴錦宮花
簇瓊筵開侍臣快靚紛徘徊紛徘徊捧壽杯仰瞻神武姿駕
馭多良才需雲一曲昇平樂八方順軌無纖埃

明詩紀事

貴陽陳 田輯

丁籤

沈周 三十六首

周字啟南長洲人景泰中以賢良薦辭不赴有石田
集十卷

四庫總目周以畫名一代詩非其所留意晚年畫境彌
高頽然天放方圓自造惟意所為詩亦揮灑淋漓自
寫天趣蓋不以字句取工徒以棲心邱壑名利兩忘
風月往還煙雲供養其胸次本無塵累故所作亦不
瑣不琢自然拔俗寄興於町畦之外可以意會而不
可加之以繩削其於詩也亦可謂教外別傳
懷麓堂後藁石田寄意林壑博涉古今圖籍以毫素
自名筆勢橫絕屢出蹊逕片楮正練流傳遍天下情
興所到或形為歌詩互以相發
匏翁家藏集石田古今諸體各臻其妙溪風渚月谷

壽岫雲形蹟若空姿態倏變玩之而愈佳攬之而無
 盡所謂清婉和平高亢超絕者兼有之
 王鏊震澤集石田作繪事峰巒煙雲波濤花卉鳥獸
 蟲魚莫不各極其態或草草點綴而意已足成輒自
 題其上時稱二絕
 懷星堂集公壯歲詩純唐格後更自不足卒老於宋
 悉索舊編毀去後學者皆不知此余為惜之
 甫田集先生詩初學唐人雅意白傅既而師眉山為
 長句已又為放翁近律所作莫不合作然其緣情隨
 事因物賦形開闔變化縱橫百出初不拘拘乎一體
 之長
 南濠詩話沈先生啟南以詩豪名海內而其詠物尤
 妙子少嘗學詩先生如詠門神云檢兩功名惟故紙
 傍誰門戶有長情楊花云借風為力終無賴與水何
 緣卻託生又嘗作落花詩云美人天遠無家別逐客
 春深盡族行不拘拘題目而亦不離乎題目茲其所
 以為妙也
 四友齋叢說余至姑蘇在衡山齋中論及石田之詩
 曰先生詩但不經意寫出意象俱新可謂妙絕一經
 改削便不能佳今有刻集往往不滿人意因口誦其
 率意者二三十首即余所見石田題畫詩甚多皆可
 傳詠與集中者如出二手乃知衡山之論不虛也

丹青志沈周繪事為當代第一山水人物花卉禽魚
 悉入神品其畫自唐宋名流及勝國諸賢上下千載
 縱橫百輩兼總條貫莫不攬其精微每營一障則長
 林巨壑小市寒墟高明委曲風趣洽然使夫鑿者若
 雲霧生於屋中山川集於几上視眾作真培塿耳一
 時名士如唐寅文璧之流咸出龍門往往致於風雲
 之表信乎國朝畫苑不知誰當並驅也
 六硯齋筆記沈啟南才情灑落見於所作畫上題語
 想其一時滿志氣酣神縱不知其工也如賦簾影云
 誰放春雲下曲瓊一重薄隔萬重情珠光蕩日花無
 語疏影通風笑有聲外面令人倍惆悵裏邊容眼自
 分明知無緣分難輕入敢當楊花燕子爭情思駱宕
 如少年不自持者夷考公生平篤行乃知是廣平梅
 花耳
 六硯齋二筆沈石田小幀四時山水做北苑筆在烏
 戌人家題句亦甚豪邁中原七子輩談詩謂啟南本
 富詩才而以題畫取辦倉猝故遂入別調此猶咎張
 旭縱酒吳生塗鬼致筆蹤狼藉也可笑沈詩曰紅滿
 枝頭綠滿湖水邊人影夕陽孤春波消雪三千頃
 與溪翁作酒壺雪壓高居玉樹中曉來寒栗不禁風
 村沽急辦雙纓碧卯飲聊充兩頰紅長竿不屬忙人
 弄要自閒人管領之釣月哦風一般趣黃塵沒馬是

何時湖上新晴宿雨收平頭舫子貼天遊瘦尊容得
 三千斛大醉去題黃鶴樓又十年前余購得石翁奇
 畫一軸幅闊二尺有咫高六尺作翠峯攢天僅分兩
 聚下略露陂麓列樹五株四直一偃對岸兩松亭亭
 中虛三尺餘盡是雲氣湧鬱挂之屏几間蒸然欲浮
 屋也神來之妙如此翁亦極滿志題句云翠倚高天
 玉出奇淋漓元氣太陰垂匡廬嵩少憑君指醉裏狂
 揮醒不知

扣舷憑軾錄姑蘇沈啟南嘗有詩題趙子昂畫馬云
 隅日晶熒耳竹披江南流落乘黃姿千金千里無人
 識笑看胡兒買去騎李文正公亦有一絕云宋家龍
 種墮燕山猶在秋風十二閑千載畫圖非售價任他
 評品落人間二詩之意皆惜子昂事元之非也
 夷白齋詩話王文恪公鑿自內閣歸時石田先生病
 亟遣人問之答詩云勇退歸來說宰公此機超出萬
 人中門前車馬多如許那有心情問病翁字墨慘淡
 難識遂為絕筆後二日而卒今集中不載
 畫禪室隨筆石田先生於勝國諸賢名蹟無不摹寫
 亦絕相似或出其上獨倪迂一種澹墨自謂難學蓋
 先生老筆密思於元鎮若淡苔疏者異趣耳
 筆精沈啟南畫入神品而詩亦清真可咏不必觀丹
 青水墨詩亦可當生絹粉本也

曹履吉博望山人稿石田翁畫多用退筆中鋒作小
 斧劈當是以意少變北苑而其源則實出巨然僧梅
 道人蒼鬱秀潤併極出藍之妙
 張丑清河書畫舫明畫學自劉廷美開山之後當推
 沈啟南為廣大教化主如唐子畏之清真文徵仲之
 古雅足可南宗北派也
 孫承澤庚子消夏記嘗見石翁題畫有絕佳之詩而
 集中俱不載安得有此人肯大為搜羅以成快編也
 田按明四家畫稱沈文唐伏白石翁畫詩均受拘束
 一派惟畫神明模範深入董巨之室詩則不受拘束
 吐詞天拔而頽然自放俚詞闕言亦時攔入然其奇
 警之處亦非拘拘繩墨者所能夢見也畫家有粗文
 細沈之目余見翁和香亭圖工細絕倫洵稱合作獨
 惜十洲不能詩未免有彭淵材之恨耳

圖錢氏沁雪石

齋前峙奇石兀可當一障沁此萬古雪互地氣魄壯蒸處勢
 欲軒得月神更王妙擬軼伏池闊未下雪浪剌鑿天借巧胸
 次具洞蕩孤立宜有鄰惟許修竹傍風雨不敢泐刻名久無

善寶此一夔足礪礪不多尙貞德充配玉白衣可呼丈我見
便欲拜良信米弗誑聊與貌高古敢有愚公安

潤色舊臨倪雲林小景

倪迂戲於畫簡到更清臞名家百餘禩所惜繼者無況有冲
淡蕭數語弁小圖吳人助清玩重價爭沽諸後雖有學人紛
紛墮繁蕪崔子強我能依樣求葫蘆墨澁不成運林慙澗與
俱醜惡正欲裂捲去不須與今夕秋燭下載見眼模糊妄意
加潤色泥塗還附塗崔子豈不鑒愛及屋上烏

七星檜

海虞七星檜宜爲羣木冠列生老子宮與邑作奇觀廣墀氣
蕭森入門凜欲汗久信天地成沃知雨露灌傳值從蕭梁其

說我恐漫驗斗形叵全七旣斃其半三株寔聊存難執歲月
算各各具一異形容匪詞翰西體裂多藁豁然敞三判東體
活亦裂筋骸互續斷北耆蝨而禿袖破舞脫腕葉亦不暇葉
榦亦不暇榦左文皮索絢孤絕頂留繖搓折象齒蹠瘦決鬼
目爛疏越復叢穴敲散仍軒岸蛟孿及猊跛努力不得竄矛
長及劔短接戰驚楚漢如此紛怪駭聃君不能按知遭幾雷
厄還屢兵火難生死付冥然造物反被玩君子重貞固頑醜
小人譎緣高坐吹簫我欲呼鶴鶴從根覓薶丹澆泉覬紅燦
長生就其蔭永作婆婆伴

田按石田有虞山古檜圖卷藏江村高氏江村云水
墨作虬枝三株蒼古屈曲誠名品也石田自題云虞
山至道觀七星檜相傳爲梁時物今僅存其三餘則
後人補植者而三株中又有雷震風摩者尤爲詭異

真奇觀也暇中與子瑁史永齡往觀焉永齡因請圖
 之歸此詩亦附書於後卷後又有吳興張淵詩云虞
 山老檜三株青斗壇半掩招搖星道人丹成化鶴去
 三檜天矯飛龍形是誰手植經千載曾見昭明讀書
 在幾回天上葬神仙不獨人間變滄海古人今人繞
 樹行古今人去樹長生乃知勁氣合元化不與凡木
 爭枯榮長洲老石好奇者百里攜杯游樹下浩嗟天
 下有樹此樹無我去此樹何人圖三日經營雙眼力
 滿空蒼翠移真迹鶴骨虬筋左紐文雷裂霜皴古秋
 色日暮袖歸歸不得滿山風雨山靈惜居然贈與臥
 雲人長嘯寒風生石壁於乎石君詩畫天下知此筆
 尤為天下奇勸君風雷當掩戶恐化蛟龍擊空去

題畫

黃鶴磯頭秋水落故人驀地相逢著十年短鬢話吳霜是非
 不暇論城郭楚江萍實待誰嘗老矣吳儂思故鄉

題趙子昂重江疊嶂卷

王孫本號松雪翁能事錯認營邱公丹青隱墨墨隱水其妙

貴淡不數濃縈灘曲瀨導巴蜀沓巘長巒連華嵩空蒙野馬
 軋雲日浩蕩碧縠吹秋風王孫隔此不可從水晶雙闕金芙
 蓉招之千年或一出黃鶴豈不思江東

朱澤民山水

睢陽老人營邱徒意匠妙絕絕代無為留清氣在天地便就
 片紙開江湖長松落葉風細細幽構縈蘿倚江住壁虎書魚
 蕩水光老屋疏茆通雨氣老人不歸空北山芳杜春風應厚
 顏微官縛人萬事拙安得浮雲相往還宦海黃塵迷白髮雲
 壑風泉清入骨思家看畫方兀然叫落西窗子規月

王右丞江干雪意圖

城中十日暑如炙頭日眩花塵土塞僧樓今日見此卷雪意

茫茫寒欲逼古楸修柳枝裊矯下有幽篁厠叢碧隔溪膠艇
不受呼平地塞渚無人迹西風翻鴉忽零亂遠雁迷雲猶噫
噫筆疏墨淡精神在收閱千年若完璧宛然一段小江南三
遠備全能事畢維名依稀半未漉老眼再摩初認得所存只
是天假借倒橐定應無吝嗇錦標內帑固自有人間間出鳳
五色老余尺素見雪渡草樹凌競人跼踖僅有溪山不盡意
何如此圖長數尺太邱孫子具法眼鑿壁收藏珍襲百我將
拙語敢印證聊寫心知并目識

贈天香李公子

戚畹佳公子天香玉雪標桓伊教弄笛秦女合吹簫酒或談
三略詩多弔六朝屏風倚春醉花鳳紫金貓

過簡書記故寮

一寮峰絕處一衲一吟身忽爾有生內寂然無此人風翻破
經卷雲護舊牀茵只有青山在如如似佛真

東來拂水崖

只有青山是勝緣青鞋布襪且輕便天收雨腳賒今日我趁
花時遣老年絕壁雲扶將墜石豁崖風勒下奔泉此來不憤
空歸去旋構新篇揀竹鐫

從軍行

馬上黃沙拂面行漢家何日不勞兵匈奴久自忘甥舅僕射
今誰託父兄雲外旌旗娑勒渡月中刁斗受降城左賢早待
長繩縛莫遣論功白髮生

無酒

山桃亂開紅欲然我宜賞之無酒錢十常九事意不愜百又
五日春可憐誰家竹葉賒爛醉滿眼花枝笑醒眠何消苦苦
仰司業便可燒茶隨玉川

張伯雨墓

靈石山頭生紫煙高墳遺蛻尙依然已知鴻寶隨人祕猶有
鵝羣與世傳幢影翠搖巖畔竹佩聲寒瀉月中泉古杭城郭
東來是應識先生化鶴年

傲雲林筆贈吳瑞卿

山中地貴無錢買水次幽居卻盡強潦草杯盤無俗客清虛
亭館但湖光弱雲過雨不多點高木當風有許涼一咏一觴

聊遣撥自家錯認是柴桑

笠澤

東南魚鳥地堪與清苕比我把珊瑚竿期誰弄雲水

磧沙寺

古殿瞰清湖高幢標碧樹聞有注詩僧欲覓今何處

睡起小酌

黃鸝啼破粉牆東簾幕深沈日日風起喚酒杯尋一醉春愁
打破落花中

送周桐村

看到梅花十萬株清吟一月住姑蘇城中屏幃都題遍施與
吳人百斛珠

西湖竹枝詞

妾在船頭偷看郎郎騎白馬好風光錦樣荷花三十里中間
一對紫鴛鴦

題劉完菴畫

天涯纔見一人還僧寺來偷半日閒勘破十年塵土夢畫中
不寫晉陽山

夏太常爲仲和寫竹

寫玉仙卿老更工墨池生雨又生風謝安老去羊曇在十載
瀟湘似夢中

方方壺畫

琵琶嶺上丹經熟海岳庵頭墨法眞草樹依然黃鶴遠江南

思煞未歸人

次東原先生與其甥魏公美詩畫韻

蒼蒼筆力似荆關白髮圖書老不閒未許羊曇乞西墅畫中
分與舊溪山

韜光庵

峰巒曲密松杉暗臺殿高低紫翠迷遊屐到門清梵歇杉雞
飛上樹頭啼

用張外史韻題明公山水

看雲側逕青藜杖映月方牀白氍袍不管果園山鳥食小童
隨地拾殘桃

聞歌憶王畏齋

丁鑑卷十一
風流文采今誰似到處春遊有所思千樹垂楊一黃鳥清歌
疑在習家池

題畫寄吳汝輝

沿溪不斷樹交花草淨漚明處處沙七尺瘦藤扶一老緩隨
流水問山家

牡丹

花好何須爛漫開一枝紅玉見重臺東風莫便相搔觸要盡
臨軒三百杯

題畫

先路未須雙白鶴扶衰還要紫藤條松陰水影溪如鏡照箇
詩翁過野橋

題畫與繼南

柳條低妥水容淨燕子亂飛花事忙芳草日長春似盡有人
將夢落池塘

題畫

浦樹冥冥綠未齊雨晴泥滑鷓鴣啼相思不見江南客一曲
竹枝春日西

題畫

百疊春山百疊溪人家分住水東西賣魚鼓響日未落一對
野禽穿竹啼

題畫

風和楊柳初偷眼雨怯桃花未放心且載一壺江上酌綠波

春酒共沈沈

題畫

番番花信是狂風到處園林掃欲空正賴東君作姑息薄留紅豔伴衰翁

畫楊梅答韓克瞻

西山有雨楊梅熟東老無詩口舌乾珍重故人知此意高林摘寄紫瑛丸

題畫

水次人家似灑西參差竹樹路俱迷溪翁兀坐不出戶日午飯香雞正啼

文徵明 三十四首

徵明初名璧以字行更字徵仲長洲人用薦授翰林院待詔有甫田集三十五卷

四庫總目徵明與沈周皆以書畫名亦竝能詩周詩揮灑淋漓但自寫其天趣如雲容水態不可限以方圓
徵明詩則雅飭之中時饒逸韻
藝苑卮言文徵仲詩如仕女淡粧維摩坐語又如小閣疏窗位置都雅而眼界易窮
讀書後余嘗謂吳興趙文敏公孟頫風流才藝惟吾
都文待詔徵明可以當之而亦少有差次其同者詩
文也書畫也又皆以薦辟起家趙詩小壯而俗文稍
雅而弱其淺同也文皆暢利而乏深沈其離古同也
書小楷趙不能去俗文不能去纖其精絕同也行押
則趙於三王近而文不能近少遜也署書則文復少
遜也入分古隸則文勝小篆則趙勝也然而象不勝
隸畫則趙之入唐宋人深而文少淺其天趣同也其
鑒賞博考復同也位在趙至一品而文僅登一命壽
則文踰九齡而趙僅垂七表異也若出處大節之異
前輩固已紛紛言之吾待詔不與同年語也
四友齋叢說衡山嘗對余言我少年學詩從陸放翁
入門故格調卑弱不若諸君皆唐聲也

冠林壑矣其文恬寂整飭詩亦從實境中出特調稍

纖弱其字法畫品尤得三昧故是一代逸品

夷白齋詩話衡山文先生有病起遣懷二律蓋不就

甯藩之徵而作也詞婉而峻足以拒之於千里之外

詩云潦倒儒官二十年業緣仍在利名間敢言冀北

無良馬深愧淮南賦小山病起秋風吹白髮雨中黃

葉暗松關不嫌窮巷頰回轍消受爐香一味閒經時

臥病斷經過自撥閒愁對酒歌意外紛紜如命在古

來賢達患名多千金逸驥空求骨萬里冥鴻肯受羅

心事悠悠那復識白頭辛苦服儒科後甯藩敗凡應

辟者崎嶇萬狀公獨晏然始知不可及也

六硯齋二筆文衡山先生詩有極似陸放翁者如煮

茶句云竹符調水沙泉活瓦鼎燒松翠蠶香吳中諸

公遣力往寶雲取泉恐其近取他水以欺乃先以竹

作籌子付山僧候力至隨水運出以為質可補茗社

故實

烏衣佳話蘇郡虎邱劍池其水不流終歲不竭正德

辛未水忽涸其下嵌岩空洞深窅莫測好事者執燭

而入見內有疊板如門戶狀相傳闔閭王所葬處文

衡山詩云吳王埋玉幾千年水落池空得墓甄地下

誰曾求寶劍眼中吾已見桑田金鳧寂寞隨塵劫石

闕分明有洞天安得元之論往事滿山寒日散蒼煙

越歲其泉復舊

黃佐泰泉集文公於書未嘗苟且或答人簡札少不

當意必再三易之不厭故愈老而愈精妙有細入毫

髮者李文正公東陽以篆自負及見公隸曰吾之篆

文生之隸蔑以加矣

書史會要待詔小楷行草深得智永筆法大書做涪

翁尤佳評者云如風舞瓊花泉鳴竹澗

謝肇淛五雜組文徵仲書得法於夔子山而參以松

雪亦時為黃米二家書然皆非此公當行惟小楷正

書即山陰在世亦當虛高足一席畫遠學郭熙近學

松雪而得意之筆往往以工緻勝至其氣韻神采獨

步一時

丹青志文先生畫師李唐吳仲圭翩翩入室大圖小

軸莫非奇致海宇欽慕縑素山積喧溢里門寸圖纔

出干臨百摹家藏市售真贋縱橫一時硯食之士沾

脂范香往往自潤年齡大耋神明不凋斷煙殘楮篝

燈夜作故得者益深保愛奉如珪璋

畫禪室隨筆文太史本色畫極類趙承旨筆微尖利

耳同能不如獨異無取絕肖似所謂魯男子學柳下

惠

畫史會要朱子朗為衡山高足衡山應酬之作多出

一

一

一

一

一

子朗手金陵一人客寓蘇州遣童子將幣於子朗求
衡山贖本童子誤送衡山宅致主人意衡山笑而受
之曰我畫真衡山聊當假子朗可乎一時傳以為笑
方薰山靜居畫論衡山太史書畫辨香松雪筆法到
格駁駁乎入吳興之室矣然自有清和閒適之趣別
廠逕庭亦由此老人品高潔所至
東泉詩話甫田集戊午元旦一律勞生九十漫隨緣
老病支離幸自全百歲幾人登耄耄一身五世見會
玄祇將去日占來日誰謂增年是減年次第梅花春
滿日可容愁到酒樽前集中多有元日除夕等題衡
山大年幾至百歲王弇州為作傳云海內習文先生
名久幾以為異代人而怪其在謂為仙且不死情事
逼真
田按衡山詩弇州輩動以吳歛少之余謂和平蘊藉
於風雅為近奚必以模宋範唐自矜優孟衣冠耶書
畫亦精絕過人為世寶重名德大年林見素王宗貫
於藝事外推之可稱具眼

道出淮泗舟中閱高常侍集有自淇涉黃河十二首次

其韻錄二

揚舫入淮泗春雲去閑閑彭門在何許仰見雲龍山逝矣黃
樓人清風邈難攀坐令千載輕宇宙俛仰間
渚蒲十里青隄柳千絲直行路尚裏裘忽忽徂春色暑寒有
恆期人事無能測魚鳥獨會心忻然似相識

次韻九達隔雨

飄風終夕號客子念明發愁聞雨蕭蕭况聽泥滑滑流潦失
牛馬春雲暗城闕昨日青楓根已逐沙痕沒不堪行路憂中
夜生華髮四月尚重裘怪事吁可咄慌忽夢吳江香羹薦春
鱖非關重土思遠道心迫卒

三城王折枝桃花圖

彤宮雨晴春婉婉妍華不隔深庭院試拈丹粉弄春韶淡痕

已破東風面醉肌暈碧曉生光脈脈閒情眉斂黃不從徐史
爭新格自有湛然宮樣粧世謂滕王元嬰善畫花鳥蛺蝶而董道獨以為勝王湛然

田按三城王朱芝坭唐定王子也畫史會要稱王精繪事所作畫英王母九老百花諸圖妙絕一時此幅設色桃花徵仲及石田云王孫好文謝裘馬日影宮牆照

楚附錄於此石田云王孫好文謝裘馬日影宮牆照形瓦鈴齋晏坐春融融過牆小桃新可寫牆頭斜亞

一梢紅纖毫寫春天無功露華半溼嬌靨笑金母西來呈木公枝山云冶芳作春不語海潑生情浩無

主半梢小出天池間萬木千條面如土粉含醉痕無賴紅倚嬌相擁嫁東風幽香返魂妃子活恨銷不盡

還重重昌穀云新桃倚牆青破萼白日深宮春漠漠纖毫聊為發丰姝隔簾小枝顏色薄深朱借耀粉借

姿露靨含嬌額半垂宮娃捧硯驚香豔羞對東風還自悲

暮春齋居即事

閒庭青草積春半思蒼茫小雨作寒食微風汎海棠芳情經

病減白日廢書長何物供欹枕縈簾一炷香

獨坐

獨坐茅檐靜澄懷道味長年光付書卷幽事續鑪香日出鳥

烏樂雨收花竹涼蕭閒習成懶不是寡迎將

東禪寺

古寺謝車馬清臨綠玉灣雙禽啼竹徑獨犬獲松關葉落秋

滿地夕陽僧自閒偶來還自去回首碧雲間

餅梅

斷枝黏碧蘚殘葢疊冰紈未乏溪山韻尤宜几格看移燈傳

壁影垂箔護春寒應斷西湖夢東風在席端

四月

春雨綠陰肥雨晴春亦歸花殘鶯獨嘯草長燕交飛香篋青
繒扇筠窗白葛衣拋書尋午枕新煖夢依微

上巳日獨行溪上有懷九達

郭外青煙柳帶柔洞庭西去水悠悠故人不見沙棠楫燕子
齊飛杜若洲日落晚風吹宿酒天寒江草喚新愁佳期寂寞
春如許辜負山花插滿頭

野亭秋興

斷雲狼藉近簾櫳天地蕭條四壁空盡日倚闌黃葉雨一番
吹鬢白蘋風年光搔首孤鴻外山色供愁落照中欲寄閒情
無那遠煙波江上採芙蓉

寄金陵許彥明兼簡王欽佩

宮樹飛霜謝玉柯秋懷應屬許渾多寒城自映秦淮月游女
新傳子夜歌別後風煙勞悵望歲殘消息定如何官忙爲問
王司馬能放晨衙幾度過

次韻答子重新春見寄

樽酒離懷強自開長歌宛轉勝悲哀梅花不與春光在茅屋
相將燕子來十日殘寒風約雨一痕新綠水生苔相思忽唱
江南曲白芷含香取次裁

石湖

石湖煙水望中迷湖上花深鳥亂啼芳草自生茶磨嶺畫橋
橫注越來溪涼風嫋嫋青蘋未往事悠悠白日西依舊江波
秋月墮傷心莫唱夜烏栖

天界寺

城南寶刹舊稱雄晉代莊嚴在眼中絕壁星辰連閣道上方
龍象湧珠宮翠圍嵐岫層層雨涼入松杉院院風身世茫茫
塵土滿欲依蓮社住江東

病中懷吳中諸寺

七尺藤牀一畝宮青山何處不相容大官底用三升酒長樂
愁聞五夜鐘笠澤風煙荒橘柚橫塘秋色老芙蓉幾時歸去
楞伽寺常伴林僧看古松 治平寺寄聽松

久客懷歸問舊遊雙娥精舍屋東頭絕憐近寺無塵到曾是
尋僧竟日留滿地綠陰誰結夏擁籬黃葉更宜秋玉泉清冽
應無恙憑仗山厨設茗甌 寶幢寺寄石窩

搔首長安望闔閭風煙漠漠九秋餘正思黃葉南朝寺忽把
飛雲慧遠書東壁磨崖知有待北窗懸榻竟何如自憐白首
無裨補虛棄閒緣臥直廬 昭慶寺寄守山

感懷

三十年來麋鹿蹤若為老去入樊籠五湖春夢扁舟雨萬里
秋風兩鬢蓬遠志出山成小草神魚失水困沙蟲白頭博得
公車召不滿東方一笑中

田按何元朗四友齋叢說云衡山先生在翰林大為
姚明山楊方城所窘時昌言於眾曰我衙門不是畫
院乃容畫匠處此惟黃泰泉馬西玄陳石亭與相得
甚歡二人只會中狀元更無餘物衡山數公長在天
地間今世豈更有道著姚涑楊維聰者耶玩此詩意
元朗之說非虛矣衡山又有句云青山應笑東方朔
何用俳優辱漢廷

寄許仲貽

問訊幽人白下蹤，若爲清世不相容。
幾回對月思玄度，安得披雲見土龍。
落日橫塘折楊柳，秋風南浦夢芙蓉。
相思滿目煙波遠，吟得新詩手自封。

龍門覽勝圖

三月韶華過雨濃，煖蒸花氣自溶溶。
茶畦麥隴青黃接，雲岫煙巒紫翠重。
一片垂楊春水渡，兩崖啼鳥夕陽松。
晚風吹酒籃輿倦，忽聽天平寺裏鐘。

雨窗戲墨

一雨垂垂春欲徂，弱雲狼藉草紛敷。
池塘水滿魚爭躍，竹徑泥深鳥亂呼。
暝色排檐失昏旦，涼聲入枕夢江湖。
山齋十日

經過斷榻得南宮水墨圖

做北苑山水

青山隱隱水漪漪，映樹蘭舟晚更移。
一縷茶煙衝宿鷺，無人知是陸天隨。

做雲林筆

遙山過雨翠微茫，疏樹離離挂夕陽。
飛盡晚霞人寂寂，虛亭無賴領秋光。

題畫

一重山崦一重溪，猶有人家住水西。
行過小橋回首望，焙茶煙起午雞啼。

咏堯民案上盆蘭

丁集卷十一
渺渺微風約珮環楚江清落研屏間美人不見瑤琴歇一卷
離騷對揜關

除夕

梅花欲動意婆娑雪霰侵陵奈歲何呵凍笑供春帖子殘年
清債已無多

題畫

綠樹敷陰翠苻香方舟十里下迴塘白鷗飛去青山暮落日
唱歌煙水長

晚意

風吹白苾晚涼生乍試蘭湯尙不勝阿閣東頭新月上玉盃
纖手自調冰

送錢元抑南歸口號二首

吳田百畝歲常荒家計蕭然只草堂卻有春眠濃似酒不將
朝市博江鄉

黃塵車轂不曾停白髮懷恩戀闕廷誰是東吳錢若水歸來
雙鬢只青青

閒興

酒闌客散小堂空旋卷疏簾受晚風坐久忽驚涼影動一痕
新月在梧桐

蓮房翠禽圖

錦雲零落楚江空翡翠翎邊夕照紅愁絕蘭橈煙水外秋香
吹老一灘風

題畫

城中塵土三千丈何似兩翁麋鹿踪隔浦晚山供一笑離離
自映夕陽松

唐寅 九首

寅字子畏吳人弘治戊午舉人坐事下獄放歸有六

如居士集

顧璘國寶新編子畏坦夷疏曠漫負狂名著廣志賦
暨連珠數十首跌宕融暢傾動羣類青谿倪公見之
亟稱才子以故翰苑爭相引援驕妬互會竟媒禍胎
棄落之餘益任放誕託興歌謠殉情體物務諧里耳
罔辟併文雖作者不尙其辭君子可以觀其度矣
國史唯疑程敏政會闡發策用劉靜修退齋記爲問
時罕知者徐經唐寅坐是得禍記具載劉因集中科
場尙正大明白不炫奇辟程此問原措大氣禍傳爲
都穆譖成
藝苑卮言唐伯虎詩如乞兒唱蓮花落其少時亦復

玉樓金將

堯山堂外紀伯虎嘗夢有人惠墨一囊龍劑千金由
是詞翰繪素擅名一時因構夢墨亭晚年寡出常坐
臨街一小樓唯乞畫者攜酒造之則酣暢竟日有言
志詩云不煉金丹不坐禪不爲商賈不耕田常時寫
就青山賣不使人間造葉錢
四友齋叢說唐六如嘗作悵悵詞其詞曰悵悵莫怪
少時年百丈游絲易惹牽何歲逢春不惆悵何處逢
情不可憐金淚公案三生白骨禪老去思量應不悔
兩袖黃金淚公案三生白骨禪老去思量應不悔
衣持鉢院門前此詩才情富麗亦何必減六朝人耶
六硯齋二筆徽客徐弱水持看唐子畏白描鐵綫勾
一人持杯對月坐脫巾露頂氣骨孤勁神采奕奕上
題云烏臺十卷青蠅案炎海干程白髮臣人盡不堪
公轉樂滿頭明月脫紗巾兒亨曰觀此詩意蓋贈一
遷謫巨公者其徐天全之流乎竹懶曰不然必我坡

翁

弇州山人四部稿伯虎才高自宋李營邱范寬李唐
馬夏至勝國吳興王黃數大家靡不研解行筆極秀
潤縝密而有韻度
丹青志唐寅畫法沈鬱風骨奇峭刊落庸瑣務求濃
厚連江疊嶂灑灑不窮信士流之雅作繪事之妙詣

評者謂其遠攻李唐足任偏師近交沈周可當半席
 王奉常集唐伯虎解元於畫無所不佳而尤工於美
 人在錢舜舉杜稷居之上蓋其生平風韻多也
 筆精唐伯虎疏狂玩世嵇阮之流也詩雖不甚雅馴
 而一段天然之趣自不可及如去日苦多休檢歷知
 音諒少莫修琴生涯畫筆兼詩筆蹤跡花船與酒船
 秋榜才名標第一春風絃管醉千場苦拈險韻邀僧
 和煖簇薰籠與妓烘皆自寫胸次非若組織套語者
 也
 清河書畫舫子畏畫做宋元無不臻妙而于李唐遺
 法尤得心印故其遇合作處往往負出藍之目
 山靜居畫論子畏畫原本劉李馬夏和以天倪資於
 書卷故法北宗者多作家面目獨子畏起而北宗畫
 法有雅格
 田按子畏詩才爛漫好為俚句選家陶汰太過并其
 有才情者不錄此君真面不見子畏領解後以事下
 獄可謂不幸康熙間宋牧仲撫吳得嘉靖中蘇州太
 守胡纘宗題唐解元墓碑為之重修墓道繚以短垣
 前築丙舍因子畏生平嘗自標置為江左第一風流
 才子遂榜為才子亭尤西堂有文紀之嘉慶辛酉子
 畏族裔仲冕來知吳縣重葺桃花庵遍徵名輩題詠
 連編累牘子畏身後庶不落寞已

短歌行

尊酒前陳欲舉不能感念疇昔氣結心冤日月悠悠我生告
 道民言無欺秉燭夜遊昏期在房蟋蟀登堂伐絲比簧庶永
 憂傷憂來如絲紛不可治綸山布谷欲出無岐頰頰若穴爨
 爨莫絕無言不疾鼠思泣血霜落飄飄鴉栖無巢羽毛單薄
 雌伏雄號緣子素纓酒埽中庭躑躅躑仰見華星來日苦
 少去日苦多民生安樂焉知其他

咏春江花月夜

麝月重輪三五夜玉人聯槩出靈岷內家近製河汾曲樂府
 新傳役鄧歌十里花香通綵殿萬枝燈燄照春波不關仙客
 饒芳思晝短歡長奈樂何

落花

春盡愁中與病中花枝遭雨又遭風鬢邊舊白添新白樹底
深紅換淺紅刻漏已隨香篆了錢囊甘爲酒杯空向來行樂
東城畔青草池塘亂活東

題畫二首

百尺松杉貼地青布衣衲衲髮星星空山寂寞人聲絕狼虎
中間讀道經

秋水接天三萬頃晚山連樹一千重呼他小艇過湖去臥看
斜陽江上峰

自畫韓熙載圖

衲衣乞食自行歌十院燒燈擁翠娥天下風流誰可並洛陽

雪裏鄭元和

酒費長苦欠經營預給餐錢費水衡多少如花後屏女燒金
時遣耿先生

題畫二首

雲歛溪山秀色開滿溪新水綠于苔偶然二叟臨磯坐無數
青山倒影來

山閣臨溪晚更佳繞崖秋樹集昏鴉何時再借西窗榻相對
寒燈細品茶

琴瑟歸品茶

山園歸路細與君熟里殊情奈昔年何湖海情面

青山樹邊來

莫論溪山淡色開新綠待小秋正昔年感一也

琴瑟二首

琴瑟歸品茶

山園歸路細與君熟里殊情奈昔年何湖海情面

青山樹邊來

